

摩訶帝經

中
命

C40
4514
90

月
ノ
四



C40-45-14

了翁上座請大藏及有
家書置之武州紫雲山
我微安塔院屋中
為學者不敢許出院門
富山二世鐵牛機謹誌



B 64853

佛說眾許摩訶帝經卷第七

宋吳譯經三藏朝散大夫試鴻臚少卿祭師臣法賢奉 詔譯

爾時有二梵天子住自梵界而作是念今南瞻部洲
有佛世尊於烏嚕尾羅池側尼連河邊菩提樹下成
等正覺彼佛世尊而於樹下結跏趺坐於七晝夜入
於火界時二梵天互相謂言我等天人亦有大力如
展臂頃能到於彼我等今者宜速往彼以妙伽陀而
伸讚請於是二天從彼梵界速至佛所旋遶瞻仰禮
重畢已住立佛前時一天子先以伽陀而讚請曰
願佛起道樹 救度眾生物 為說最上法

經

長生聖可奇學七

一

命五

令得智法寶

第二天子亦說伽陀而讚請曰

佛面如滿月 心淨煩惱除 願說甘露法

行安樂世間

二梵天子說是伽陀讚請佛已隱而不現

爾時世尊出彼禪定觀諸世間說伽陀曰

世間所有諸欲樂 乃至天上所有樂

若比斷貪之大樂 十六分之不及一

復說伽陀曰

擔世苦重擔 迷苦而不捨 若捨苦重擔

能擔最上樂

復說伽陀曰

能斷世間一切愛 一切煩惱自除滅

知煩惱者脫輪迴 當得解脫之快樂

爾時世尊於七晝夜踟躕而坐入於禪定當爾之際亦無有人持食供養纔說偈已忽有商主名布薩婆梨迦將五百兩車載諸寶貨欲往他國經過近地時布薩婆梨迦以宿善根力常起思念云何令我獲得善友及妙眷屬忽聞人言世尊入定七日不飲不食作是念言今佛世尊在烏嚕尾羅池側尼連河邊菩

提樹下經七晝夜不飲不食而入禪定得解脫樂成
等正覺此我善友當爲我益我今宜速詣彼奉食作
最上供養發是心已時有天人以天報通聞知布薩
婆梨迦發如是心乃觀照布薩婆梨迦及一切所將
車乘等已乃先白佛言今商主布薩婆梨迦聞佛在
此得解脫樂成等正覺於菩提樹下踟躕而坐入於
禪定經七晝夜不飲不食被人定來獻食供養希望
果報求大安樂及利益故作是語已隱而不見於是
布薩婆梨迦與同行親友自手辦造種種飲食美妙
香潔品味成已卽專注虔誠持以奉佛未至佛所復

作斯念我今奉食爲最上供養如來必當演說最上
之法而使我等以獻食因得天樂果作是念已尋至
佛所卽用頭面禮如來足禮已起立瞻仰而住時布
薩婆梨迦白佛言世尊我與親友辦種種飲食而來
供養願佛慈愍唯垂納受

爾時世尊許而未受何以故佛初成道未有應器作
是思惟我若不以應器受斯供養者彼外道天魔必
生毀謗作如是言豈有過去正等正覺爲利益衆生
故如是受其供養耶佛作念時彼梵天子白佛言世
尊過去正等正覺爲利益衆生故皆持應器而受檀

施飲食供養於是世尊思欲應器彼四大天王卽知佛意乃各於自天令其妙工選取寶石於少時間造成應器清淨瑩徹殊妙無比時四天王造成鉢已各自持同來奉獻至佛所已卽以頭面禮世尊足禮已瞻仰住立一面爾時四大天王異口同聲白世尊言我等今者各以寶石造得應器同來奉上唯願世尊哀愍納受作是語已願聽佛旨

爾時世尊復自思惟今此四王各獻一鉢我若受一三天不喜我若受二一天生惱我今等受四天之鉢旣受鉢已又復思惟用唯一器四鉢孰先卽以神力合四爲一四器雖合楞際疊存於是世尊爲利生故卽持此鉢於布薩婆梨迦處受所施食旣納受已卽謂布薩婆梨迦曰我今爲汝演說三歸汝當諦受時布薩婆梨迦奉教而住

世尊曰歸依佛歸依法歸依未來僧伽此是三歸盡汝形壽不得違誨時布薩婆梨迦曰佛言我今歸依佛歸依法歸依未來僧伽盡此形壽不敢違誨

爾時世尊謂布薩婆梨迦曰隨喜布施感果不虛汝自捨施定獲快樂所求福報依願皆得亦復當證最上寂靜布薩婆梨迦若行布施所作福利人天及魔

不能迷惑乃至禪定智慧若能盡行能竭苦源見前
證聖是時布薩婆梨迦聞是說已心意快然歡喜踊
躍願於未來世中憶念受持亦不忘失作是語已禮
佛而退

爾時世尊受得商王布薩婆梨迦所施之食卽持往
彼尼連河邊卽於岸上敷草而坐喫所受食食既畢
已又復盥漱如是之際忽覺體中而發風病何以故
佛出世間示斯爲緣欲令衆生知身如幻故是時天
魔恐佛出世教化衆生出離三界當空我境常伺其
隙欲來惑亂忽知發疾速離天界來至佛所而作是

言善逝汝今不安涅槃時至我今請佛入大涅槃爾
時世尊知是魔來欲亂我心佛謂魔言我涅槃未至
我今直待聲聞弟子解佛法分智慧明達了知教本
廣演法相乃至苾芻苾芻尼優婆塞優婆夷等修持
梵行有衆多人欲周天地及彼天人皆證解脫我於
是時方入涅槃時彼天魔聞佛語已知不涅槃心生
懊惱於是天魔慙恥而退

爾時帝釋天王遙知世尊體發風病自天而下至瞻
部洲去菩提樹不近不遠有大訶梨勒林於中而住
於此林中取得上好訶梨勒已疾往佛所到佛所已

頭面著地禮世尊足禮已瞻仰住立一面白言世尊
我知聖體小有風病此瞻部洲有訶梨勒色妙馨香
可療斯恙我今持來奉上世尊唯願大慈納受而食
世尊受已尋便服食風病卽除體安如故世尊慰勞
帝釋乃退還歸天宮

爾時世尊又復離菩提樹往彼母啣鱗那龍王宮到
彼宮已於一樹下跏趺而坐入於禪定是時彼處七
日七夜降霆大雨時母啣鱗那龍王以雨方霑知佛
在定恐其風雨之氣互侵佛身又恐蚊蚋蝘蠅咬擾
聖體遂以自身纏繞七布巾首上覆如傘蓋相經七
晝夜不動不搖佛將出定龍自攝身龍王還宮復以
種種花鬘塗香嚴飾其身來至佛所頂禮佛足白言
世尊七日已來風雨之氣蚊蚋之類侵擾以否聖體
云何於是世尊說伽陀曰

觀察於世間 一切衆生等 若得無侵害

歡喜復快樂 離欲斷煩惱 此樂難比喻

無明若調伏 斯爲最上樂

爾時世尊說是伽陀荅龍王已卽離彼處還來菩提
樹下結跏趺坐經七晝夜入定觀察十二緣生云何
根本而因得生所謂因於無明乃緣於行行緣識識

緣名色名色緣六入六入緣觸觸緣受受緣愛愛緣
取取緣有有緣生生緣老死憂悲苦惱由如是因得
一大苦蘊集如是根本不生則一切得滅所謂無明
滅卽行滅行滅卽識滅識滅卽名色滅名色滅卽六
入滅六入滅卽觸滅觸滅卽受滅受滅卽愛滅愛滅
卽取滅取滅卽有滅有滅卽生滅生滅卽老死憂悲
苦惱滅解如是滅則得一大苦蘊滅
爾時世尊於七晝夜在於禪定如是觀察十二緣生
已乃出三摩地而說伽陀曰

淨行觀察苦相時 知一一法有所因

若知苦相之不生	自然一切所愛斷
淨行觀察滅受時	知滅受法之無盡
若知滅受之不生	自然一切所愛斷
淨行觀察緣生時	乃知緣生法無盡
若知緣生之不生	自然一切所愛斷
淨行觀察有漏時	乃知有漏法無盡
若知有漏法不生	自然一切所愛斷
淨行觀察如是法	知如是法悉無生
如日徧照於世間	行任虛空無所礙
淨行觀察於苦相	知一一苦悉無生

破壞煩惱得無餘

如佛降伏魔羅軍

爾時世尊說伽陀已復說是言若有衆生斷於輪迴知甚深法微妙言辭悉能通解如是之人是有智者我爲此等人說我今此等人知我今如是獨處林野依相應行見行法樂是時世尊說是語已自在行住無諸繫著不云說法亦不生心是時娑婆世界王大梵天王知於世尊不云說法亦不生心而作斯念若如是者世間滅壞何以故如來應正等覺出於世間如優曇鉢花時乃一現今不說法自取法樂當令一切有貪欲者樂邪法者不覺不悟云何世間而不滅

壞我今往彼伸其勸請是時梵王娑婆世界王離彼梵界如展臂頃卽至佛所任立佛前說伽陀曰

出世摩伽國

過去法無垢

悉開甘露門

演法濟衆生

世尊告言我法甚深難見難了我若輒說速取滅壞何以故世間一切樂邪法者有貪欲者不樂聽受不能覺悟何以故貪欲之者黑闇覆障故梵王白言世尊衆生者世間生世間老有利根鈍根及以中根乃至相好易化塵垢輕微諸異生等世尊譬如青蓮花或白蓮花等生於水中於水而長於水而老其中或

有出水者或不出水者亦復如是世尊諸異生等若不爲說種種妙法皆趣沉墜唯願善逝賜其法寶唯願善逝降於甘露

爾時世尊受於梵王殷勤勸請已默而許之遂以佛眼審諦觀察世間衆生世間生世間老鈍根者利根者乃至於中下顏貌之好醜易化與難化少塵極少塵如是衆生等我若不爲說種種之妙法不知諸苦本悉趣於沉墜世尊如是觀察知已而起大悲將演妙法先說偈言

我今降法甘露雨

當潤樂聞及一切

從此人間得法因

若見弊魔不廣說

是時梵王娑婆世界主聞此偈已定知世尊演說妙法身心快樂喜不自勝卽以頭面禮世尊足右繞三匝隱沒而退

爾時世尊卽自思惟今者何人先得聞法乃憶往昔阿囉拏迦羅摩等仙人可先聞法何以故我於往昔過彼住處受其妙供及受其囑我今先爲彼人說法作是念時乃有天人來白佛言彼阿囉拏迦羅摩等皆已命終方今七日世尊默知又聞天告乃嗟歎曰無常大事世不驚乎又念阿囉拏迦羅摩等薄祐如

是不聞正法耶

爾時世尊復念何人可先聞法彼嚕捺囉迦羅摩子亦曾供我亦曾囑我作是念次彼有天人名曰囉吒又告佛曰彼嚕捺囉迦囉摩子亦趣無常世尊默知復聞天告世尊又歎曰正法難聞薄祐乃爾於是世尊思念五人我出王宮入山苦行是等尋來供侍於我我應先爲彼人說法於是淨天眼觀在何處見彼五人在波羅奈國鹿野苑中於是世尊自菩提樹往波羅奈國鹿野之苑時於路次有一仙人名烏波誡相逆而來時彼仙人忽於路次得見世尊又見身

丈六金色晃然相好端嚴殊特超世驚歎良久乃作是言瞿曇瞿曇覩汝相好湛然清淨復如金色非世所同何因出家歸依何法誰爲汝師今復何去爾時世尊乃說伽陀荅仙人曰

我今無所師 處世獨無侶 悟正等菩提

爲最天人師 知世間諸法 不染亦不斷

具一切智力 當降魔羅軍

烏波誡仙人言瞿曇實如汝言是佛無疑佛言如是了知及得漏盡降伏罪業故號爲佛時烏波誡仙人又復問言瞿曇今往何處佛言往波羅奈國擊大法

鼓轉大法輪當說世間未曾有說亦復宣示過去佛
勅當令世間知法離欲佛說是已彼烏波誡仙人頂
禮世尊隨路而去

爾時世尊卽自往彼波羅奈國鹿野之苑時彼五人
其名灑替梨迦摩斛梨迦末斛羅唎鉢囉賀拏尾
婆囉多等方新澡沐香油塗身廣排飲饌列坐食次
彼五人等遙見世尊知非他人皆大驚恠互相議曰
今此太子居山苦行欲成佛道今乃退志還尋我等
我等安坐勿得迎待世尊遙知默而行詣佛身巍巍
由如金山尊貴吉祥相好具足有大威德無能儔匹

時五人等見佛俯近威德加臨無能安坐皆起迎待
於是五人咸言善來請當就坐是時五人或爲佛敷
座者或汲水洗足者或奉上名衣者或接手扶侍者
於是五人承事於佛同於往昔是時世尊安詳就坐
從容而言謂五人曰汝等五人初見我時共有要議
欲輕於我汝等甚愚汝等皆是我族當行我戒是時
世尊復告五人曰汝等莫於如來生起輕慢何以故
汝等若於如來起於輕慢者得無利益後於長夜獲
大苦惱五人白言佛於昔時所有威儀最上世法殊
妙之事後行苦行得最勝清淨無上之智通達妙法

本所觸行今在何處佛言汝灑替梨迦末斛梨迦末
斛羅嚩嚩鉢囉賀拏尾娑囉多等若於衆生廣大供
養廣大之施上妙飲食酥乳之味食畢沐浴香油塗
身潔淨諸根嚴好殊麗前後顧視容色適悅汝等如
是爲見我者非見於我灑替梨迦等言如是如是時
彼五人常行乞食世尊到已或三人乞食二人奉事
或二人乞食一人奉事互爲給侍精進無懈佛因制
之曰有二事法修行之人而不得行云何二事爲於
色欲生貪此輪迴根非上人法若有人能自正其心
修其苦行於此五蘊三毒如是諸法無迷無執智眼

觀察斷彼輪迴離於苦樂行於中道復於正見正思
惟正語正業正命正勤正念正定於此八正而廣修
習獲於神通證於涅槃得名中道當趣無上正等正
覺我於是事悉辦無餘

爾時世尊如是說已又復觀知五人堪能受法卽復
告曰此是苦汝須知於是五人思惟以慧眼觀是法
於過去世曾所聞聽菩提發生而得了知又復告曰
此是集汝應斷於是五人復思是法以慧眼觀於過
去世曾所聽聞菩提發生而得了知又復告曰此是
滅汝應證於是五人又復思惟以慧眼觀此法過去

已曾聞聽菩提發生還得了知又復告曰此是道汝應修於是五人又復思惟以慧眼觀察此法亦於過去之世曾所聞聽菩提發生還得了知

爾時世尊又告五人曰苦法我已知集法我已斷滅法我已證道法我已修我以是法乃成佛道

爾時世尊又告五人曰汝等可應學吾知於苦斷於集證於滅修其道汝等若能於此四諦真實之道而得了覺自然知彼無集無解無明無慧無菩提無不生乃至梵界魔界諸天世人沙門婆羅門等亦無所任離顛倒想心意快然當來決證無上正等正覺

爾時世尊如是三轉十二行法輪時尊者鉤扼等除去塵垢得法眼淨及彼八萬天人得法眼淨於是五人既悟道已乃白佛言我等欲於佛法出家願賜聽許爾時如來謂五人曰善來苾芻於是五人鬚髮自落袈裟著身成沙門形爾時世尊復謂鉤扼等言色是常是無常是苦是非苦是空是非空是有我是無我受想行識是常是無常是苦是非苦是空是不空是有我是無我鉤扼荅言世尊我觀色受想行識皆是無常苦空無我之法爾時五苾芻聞佛說是五蘊之法乃得漏盡證於無學時佛謂言汝等所作已辦

梵行已立我生已滅永斷輪迴我與汝等六人當爲
世間第一福田三寶之名今已具足

爾時世尊說是法時有一夜又名曰普摩高聲唱言
今日世尊於波羅奈國鹿野苑中仙人住處三轉四
諦十二行法輪爲愍念利益世出世間梵魔天人沙
門婆羅門等時彼普摩夜又作是唱已彼四大王天
三十三天及彼諸天互相告唱須臾之間乃至梵界
諸梵天等皆悉聞知世尊在彼波羅奈國鹿野苑中
仙人住處三轉法輪三寶出現利樂人天及諸有情
是時地即大動天亦大明於是梵王帝釋及諸天等

各各執持寶幢幡蓋來詣佛所雨天妙花作天妓樂
歌頌讚嘆種種供養歡喜踊躍禮佛而退
佛說衆許摩訶帝經卷第七終

依寧居士劉葵

助刻

衆許摩訶帝經第七卷

計字四千九百六十個

該銀一二兩四錢八分

伏願

六根雪淨三障冰消生生啟悟妙心世世弘開道

眼海虞釋常字對

崇禎九年季夏月徑山化城寺識

佛說衆許摩訶帝經卷第八

卍

宋西天譯三藏朝散大夫試鴻臚少卿明教大師臣賢奉 詔譯

爾時世尊初轉法輪度五苾芻已將諸苾芻往躡羅迦河岸遊止暫住時波羅奈國中有俱梨迦長者子名曰耶舍家中巨富廣有財寶母氏眷屬皆國中豪族多畜奴婢互誇強盛是奴婢輩皆悉年少聰明多藝復擅歌樂常侍左右時長者子耶舍忽於一日在自家中令諸妓人嚴容麗服鼓動音樂與諸眷屬恣其快樂自旦至夜方始停息時妓女輩各還所止以其困乏睡極昏重無所驚覺時長者子耶舍於夜後

分巡諸房室檢察庫藏見諸妓女門不掩閉身無拘
檢或髮髻蓬亂或衣服離身仰覆縱橫現露形體猶
如死人一無異別時長者于耶舍因果成熟出家時
至覩斯相狀忽生獸離猶如發狂耶舍以其富盛有
摩尼所莊之履數及千緡於是著寶莊履夜詣王宮
告守門者曰我苦我苦請報於王其守門者不肯聞
報復詣後門亦謂守門者曰我苦我苦請報於王其
守門者亦又不聽是時耶舍自夜後分直至天曉乃
出城門至嚩囉迦河岸往來而行口中但言我苦我
苦爾時世尊在於彼岸晨旦經行於是耶舍遙見世

尊威德端嚴無與等者知非常人乃告之曰聖者我
苦聖者我苦

爾時世尊卽以軟言而慰呼之善男子汝來我今此
處安樂無事時彼耶舍得聞世尊慈悲之聲軟言相
呼卽脫寶履致於岸側度嚩囉河詣於佛所頂禮佛
足却住一面於是世尊乃與耶舍同還遊止敷座而
坐卽爲耶舍如應說法

爾時世尊謂耶舍曰布施持戒生天之因雖五欲自
在輪迴未斷勿以天福心生喜樂汝今欲求割斷煩
惱除去蓋障得解脫者當於聖道而加修習可證道

跡可證涅槃又言耶舍我今問汝色是常是非常耶
是苦非苦耶是空非空耶有我無我耶受想行識是
常非常耶是苦非苦耶是空非空耶有我無我耶時
彼耶舍得聞世尊說如是法譬如白色之衣易爲染
著得離塵垢獲法眼淨

於是世尊又爲廣說苦集滅道四聖諦法於是耶舍
卽於座上得漏盡意解證無學果便卽發言答世尊
曰如佛所說色受想行識者乃是無常苦空無我之
法世尊知彼實已得證漏盡解脫猶著在家寶飾之
衣乃爲耶舍說伽陀曰

若得正道 猶戀莊嚴 雖行梵行 未名息心

若能調伏 執杖自驚 雖婆羅門 是真沙門

爾時耶舍宿有黠慧又證無學纔聞佛說此妙伽陀
乃自思惟世尊說此正爲於我猶著在家寶飾之衣
乃白佛言世尊我今於佛法中願爲沙門世尊大慈
惟見聽許佛言善來苾芻鬚髮自落袈裟著身成沙
門形儀相具足時俱梨迦長者始及天曉見彼左右
忽忽報言長者子耶舍不待天曉出自舍去今不見
廻未委所至時俱梨迦長者聞是語已驚怪非常乃
私自念我子夜出得非不正之人而相誘耶又問侍

經
卷五
三
八
五
人我子所履所服爲常非常耶侍人對曰彼所常服
妙衣寶履不在常處必著隨身是時俱梨迦長者又
復思惟我子耶舍著寶莊履及上妙衣必無惡事我
今宜速諸處尋覓於是令諸僮僕分頭尋覓兼自出
城門至嚩囉迦河岸訪問尋求忽於岸邊見子所著
寶莊之履又聞彼岸有佛及將弟子於彼遊止心自
思惟我子決定在彼而住時俱梨迦長者卽自脫履
渡河訪覓將至佛所佛亦遙見知來尋子旣至佛前
覩佛光明又見異相未及言子唯卽驚歎世尊方便
承其發心乃先諭言善來長者得無疲勞且可就坐

今與汝語時俱梨迦長者初覩世尊威光相好又蒙
軟言慰諭但益瞻仰全忘覓子世尊告曰我有妙法
汝樂聞耶俱梨迦長者言願佛哀愍唯垂宣示佛言
布施持戒生天之因天之果報非爲究竟若斷煩惱
可趣聖道俱梨迦長者我今問汝色是常非常耶是
苦非苦耶是空非空耶有我無我耶又曰受想行識
是常非常耶是苦非苦耶是空不空耶有我無我耶
爾時世尊廣爲解說汝可觀察實言報我時俱梨迦
長者曰我今實知色受想行識乃是無常苦空無我
之法

爾時世尊又爲廣說四諦之法時俱梨迦長者因是
除去塵垢得法眼淨身心適悅歡喜無量

爾時世尊知彼長者心意開解恩愛淡薄若見其子
作沙門相必無憂苦乃發問言俱梨迦汝何因緣來
至於此俱梨迦長者具以上事告於世尊佛呼苾芻
耶舍卽出是時長者見耶舍出作沙門形復知漏盡
證無學果乃作是言我子快哉初能自利又能利他
使我得聞殊妙之法遠離塵垢法眼清淨皆由我子
獲斯妙利於是俱梨迦復白佛言我今住家願佛垂
戒佛言善哉善哉我今爲汝受於三歸汝當諦受

佛言俱梨迦汝歸依佛歸依法歸依僧伽汝盡形壽
不得違悔俱梨迦言我今歸依佛歸依法歸依僧伽
佛言俱梨迦汝今於吾受得三歸依竟當爲世間第
一優婆塞爾時俱梨迦蒙佛爲說種種之法乃得遠
塵離垢法眼清淨又蒙與受三自歸已心意泰然歡
喜無量卽白佛言我於來日就自居舍備齋供養唯
願世尊及聖衆等慈悲愍念同賜降赴佛卽默然時
俱梨迦知佛受請歡喜踊躍旋遶三匝禮佛而退彼
俱梨迦旣請佛已速至家中告彼妻子男女并諸眷
屬彼耶舍夜出渡疇囉迦河投佛出家已作沙門兼

已得證阿羅漢果我尋耶舍亦到於彼便蒙世尊爲
我說法獲離塵垢得法眼淨又爲我受三自歸法我
已請佛來日供養佛與聖衆必來降赴汝諸眷屬今
當爲我速淨舍宅香水灑地無令塵坌及速備辦種
種飲食乃至香花供養之具汝等專至亦獲大利旣
至來朝明相現已家內營辦一一皆畢俱梨迦長者
卽於庭際執爐焚香遙白世尊飲食已辦願佛垂降
爾時世尊卽告拘拈諸羅漢等可共往赴俱梨迦請
又告耶舍曰汝歸本家形服非舊母親眷屬心必悲
惱汝今出家已證無學宜以方便化令歡喜佛誠勅

已卽與同詣家中受食時俱梨迦長者立於門首顯
望佛至佛旣至門俱梨迦長者頂禮佛足焚香迎引
至第二門時耶舍母及乳母眷屬悉出迎接初覩世
尊相好端嚴威光殊異又見耶舍及諸羅漢法服嚴
身威儀詳審凡諸進止有殊異道圍繞瞻仰歡喜無
極俱梨迦長者請佛就坐諸羅漢等亦復就座是時
長者與諸眷屬次第禮足禮畢瞻仰各在一面

爾時世尊爲耶舍母及諸眷屬如應說法使其歡喜
又令發起菩提之心乃告之曰布施持戒得生天上
雖復快樂未出輪迴欲出輪迴當斷煩惱於生滅法

而須了知汝等諦聽深心思惟我今爲汝分別廣說
佛言色是無常是苦是空是無我法又言受想行識
是無常是苦是空是無我法汝等知否如是世尊廣
爲分別時耶舍母及乳母等皆已宿植善本今遇世
尊爲說妙法如潔白衣染成衆色隨其所染皆得鮮
妙耶舍母等亦復如是世尊乃至廣爲演說苦集滅
道四聖諦法耶舍母等不起於座得法眼淨斷除貪
愛離諸疑惑而於諸法知見無礙卽從座起任立佛
前白言世尊五蘊三毒苦空無我無常之法我已實
知

爾時世尊卽爲受其二歸受三歸竟歡喜踊躍禮謝
於佛而又白言食時已至佛卽默然於是長者及耶
舍母悉持所辦上妙香美種種飲食自手奉上佛及
聖衆佛與聖衆食畢澡盥清淨已竟是時長者及耶
舍母卽於佛前各坐卑座請佛說法佛卽化利令心
歡喜時俱梨迦長者與耶舍母等復白佛言我有少
疑欲伸啓問願佛開說斷我等疑今我子耶舍當有
何因而獲是果乃於家中忽發此心會遇世尊爲說
妙法而得法服莊嚴其身獲諸漏盡證羅漢果
爾時世尊告長者等言過去世時波羅奈國不近不

遠有一仙人於彼而住有慈悲心利益衆生恒入城中持鉢乞食時彼仙人會於一日於四衢道見一死蟲覩其壞爛又復臭穢過往之者不可瞻近彼仙忽起思念我身無常不異於此遂於輪迴而生厭離當此之時有一童子亦見死蟲同彼仙人厭輪迴苦而彼仙人及以童子既厭輪迴後勤修習解脫正道彼仙人者卽我身是彼童子者卽耶舍是是故耶舍今遇於我得聞妙法證無學果於是俱梨迦長者及諸眷屬聞佛說已歡喜信受禮謝而退於是世尊將諸聖衆還歸鹿野仙人住處

爾時俱梨迦復有四子一名布囉努二名尾摩羅三名識鏝鉢帝四名蘇摩斛見彼耶舍投佛出家證羅漢果咸作斯念我等云何猶戀貪愛不求解脫又復思惟若今世間無最上覺復有何人說最上法我等輪迴無能斷絕今值佛法宜生正信當共捨家如彼耶舍以求解脫於是布囉努等兄弟四人出波羅奈國同詣佛所頂禮佛足却住一面而白佛言我俱梨迦子耶舍之弟今來投佛欲爲沙門唯願世尊慈愍聽許

爾時世尊卽令弟子與剃鬚髮著袈裟衣旣爲沙門

又與說法佛言布囉努汝爲沙門當行苦行攝心不亂求真諦法令心無我而於諸法決定了知盡生死源永斷輪轉以趣解脫時布囉努等聞佛世尊說是法已正信決定精勤修習獲諸漏盡得心解脫所作已作梵行已立我生已滅永斷輪迴證羅漢果是時乃有十大阿羅漢

爾時波羅奈國中復有大族諸長者子正五十人與俱梨迦子常爲朋友忽聞俱梨迦子耶舍及布囉努等隨佛出家證於道果咸作是念彼長者子耶舍及布囉努等種族尊勝巨富難倫聰慧過人端嚴罕匹

常受快樂無諸苦惱猶能捨家學道以求解脫我等云何猶顧戀耶諸長者子作是念已出波羅奈國同詣佛所至佛所已頂禮佛足任立一面諸長者子同白佛言我諸長者子正五十人今欲於佛法出家而爲沙門願佛慈悲哀愍聽許佛言善哉汝長者子捨家爲道今正是時卽令弟子與剃鬚髮著袈裟衣度爲沙門是時世尊又與說法令求勝果佛言汝長者子各各捨家爲沙門者當須一身行於苦行攝心不亂求真諦法令心無我而於諸法決定了知盡生死源永斷輪轉以趣解脫諸長者子得聞世尊說是法

已正信決定精勤修習獲盡諸漏心得解脫所作已作梵行已立我生已滅永斷輪迴悉皆證得阿羅漢果於是世間始有六十大阿羅漢

爾時世尊觀諸弟子而告之曰我從無量劫來勤行精進乃於今日得成正覺正爲一切衆生解諸繫縛汝等今日悉於我處得聞正法漏盡解脫三明六通皆已具足天上人間離其繫縛可與衆生爲最福田宜行慈愍隨緣利樂所言未竟時彼罪魔名摩拏嚩迦卽便遙知今日瞿曇沙門與諸弟子在鹿野苑中而共商議謂言汝等天上人間得離繫縛宜各隨緣

而行利樂我今若不令其惑亂必定化盡世間衆生時彼罪魔摩拏嚩迦自變其身同世間人如展臂頃卽至佛所任立佛前說伽陀曰

汝解脫相非解脫

得此解脫非沙門

汝今自處大繫縛

當欲解脫於何人

爾時世尊知是罪魔摩拏嚩迦來相惑亂徒自作業何能壞我卽說伽陀答罪魔曰

我於天上及人間

已能解脫諸繫縛

乃至無學離繫縛

汝之罪魔不能破

時魔摩拏嚩迦聞是語已卽自思惟此瞿曇沙門知

他心事必不能亂唯自苦惱隱沒而退爾時世尊告諸苾芻我已語汝汝等已於天上人間離諸繫縛可愍念衆生而行化導汝等速去時諸羅漢奉佛教勅禮辭而去

爾時世尊與諸羅漢皆離鹿死適悅之地佛卽獨行往詣西曩野你聚落烏魯尾螺池邊迦囉波娑林下經行宴坐時聚落中有六十賢衆在西曩野你中將諸妓女及彼音樂日日作樂無有停罷忽有一女於此快樂心生厭離捨衆逃避不知所至時六十賢衆善根成熟因尋此女人迦囉波娑林忽於樹下見佛

世尊驚訝非常互相謂曰今此沙門身如金山光明晃耀面目端正諸相具足吉祥尊貴無有倫匹嘆不能已卽前行詣而發問言沙門止此還曾見一女人來否佛言賢衆此處寂靜非女所遊汝今來此爲尋女人何不自爲尋其身耶是時賢衆聞佛所說卽有省悟乃知前非而答佛言我等先尋女人誠是過咎今自尋身願垂指示佛言賢衆汝既如是且可安坐我今爲汝宣說法要是賢衆等卽禮佛足退坐一面佛言賢衆布施持戒生天之因雖復快樂非爲究竟若求出離當斷煩惱亦復分別生滅之法時彼賢衆

纔聞是說蓋障卽除心內思惟歡喜無量佛知其意
 卽爲廣說苦集滅道四聖諦法彼賢衆等如潔白衣
 易染衆色隨彼所染皆得鮮好而賢衆等卽於座上
 證四聖諦微妙之理旣於諸法而得知見貪愛息滅
 疑惑永斷乃於佛法證四無畏卽從座起徧袒右肩
 合掌向佛而作是言唯願世尊慈哀知察我歸依佛
 歸依法歸依僧自今已去永不殺生畢身奉持優婆
 塞戒時六十賢衆於世尊所得聞法已頂禮佛足歡
 喜而退

佛說衆許摩訶帝經卷第八

音釋

顛魚容切 盥盥古玩切 漱先奏切 澆口也 蚊無分切
 蝻蝻音盲 啞入答切 邛音仰 鉤居候切 納儒稅切
 兩枚下八切 黠慧也 鏤忙范切

休寧居士劉葵 助刻
 衆許摩訶帝經第八卷 計字四千三百二十六
 個 該銀二兩一錢六分三厘 伏願
 六根雪淨三障水清生生啟悟妙心世世弘開道
 眼 海虞釋常孚對
 崇禎九年季夏月徑山化城寺識

卷八
 三
 五

佛說衆許摩訶帝經卷第九

宋西天譯經三藏朝散大夫試鴻臚少卿明教大師臣法賢奉

詔譯

爾時世尊度彼六十賢衆已復思何人先可受化乃
憶西曩野你聚落之中有難那及長女并眷屬等堪
先受化憶念我昔苦行去時經過彼舍時難那及長
女并眷屬等共持乳粥及酥蜜等來獻於我今觀彼
等根緣已熟堪可化度作是念已世尊翌日伺候食
時執持應噐入西曩野你聚落之中次第乞食至難
那舍時彼難那及長女等見佛至門踊躍歡喜卽謂
佛曰善來世尊聖體安否世尊大慈暫過我舍佛卽

入門難那并女爲佛敷座世尊昇座彼難那及女并
諸眷屬卽以頭面禮佛雙足各各禮已退坐一面
爾時世尊卽爲說法佛言難那汝等諦聽布施持戒
生天之因雖感欲樂終當退失汝等當斷一切煩惱
以求出離又復廣爲分別生滅之法而令了知佛說
是時彼難那等根緣成熟蓋障卽除深心思惟歡喜
無量佛卽又爲廣說苦集滅道四聖諦法時難那并
女及眷屬等卽於座上得法知見證四諦理斷諸疑
惑貪愛永除一向信佛卽從座起合掌頂禮白言世
尊我於世尊所說諸法實得知見我今歸佛歸法歸

依僧伽願爲近事永不殺生又白佛言食時已至願
佛大慈受我供養佛卽默然時彼難那并眷屬等見
佛默然知已受請持種種香花飲食手自奉上世尊
食畢澡漱已竟難那眷屬復處卑座樂欲聽法佛卽
方便種種說法難那眷屬復得聞法歡喜踊躍禮佛
而退

爾時世尊於西曩野你聚落化難那等已卽復思念
欲詣摩伽陀國隨緣利樂時摩伽陀國有善相師烏
嚕尾螺迦葉壽年三百歲自謂已得阿羅漢道居尼
連河側弟子眷屬有五百人摩伽陀國王及輔相一

切民衆皆尊重供養更無有上彼摩伽陀國有無量
人衆由如盲冥黑暗障蔽常依烏嚕尾螺以爲引導
彼諸人衆雖承化導無由出離我今化彼烏嚕尾螺
迦葉及彼人衆使見正道旣思惟已行詣摩伽陀國
尼連河側烏嚕尾螺迦葉在處時烏嚕尾螺迦葉忽
見世尊來至在處又見相好具足威德殊異卽前迎
接復加恭敬而謂佛言善來大沙門先任何處今忽
至此卽爲世尊敷座請坐世尊就坐彼烏嚕尾螺迦
葉亦自就坐卽以種種言辭慰問世尊世尊亦以種
種方便開導教化談論未竟日已西暮佛卽告言今

已日暮我於汝舍有寂靜處欲寄一宿烏嚕尾螺迦
葉白言大沙門我諸房舍眷屬在中唯一靜處堪沙
門宿然此靜處毒龍在中雖不恠惜恐有所損請自
思之佛告烏嚕尾螺迦葉言但願見借必無傷害烏
嚕尾螺迦葉告言若能爾者當自隨意於是世尊卽
詣龍舍佛於舍外自洗足已便入龍舍自布淨草跏
趺而坐佛卽便入三摩地時彼毒龍忽見世尊在舍
中坐卽發嗔怒乃作烟霧徧舍內外於是世尊以神
通力亦化烟霧毒龍轉怒舍內火著佛以神力亦化
其火佛與毒龍二火俱熾時彼龍舍周徧內外成大

火聚火燄上騰明照遠近時彼迦葉常於夜分出觀
星象乃復觀見龍舍成大火聚即便傷歎苦哉苦哉
彼端正沙門不聽我語龍火熾盛百倍於常可惜沙
門必被傷害時烏嚕尾螺迦葉及與眷屬皆見大火
熾盛之相時彼毒龍知於世尊不能損害又以自身
亦大疲乏乃息惡毒火便消滅世尊是時亦攝神力
毒龍降伏收於鉢內天曉之後烏嚕尾螺迦葉與眷
屬等行詣龍舍觀於沙門既到龍舍見佛端然而白
佛言汝大沙門宿夜安否佛言我安汝大沙門鉢中
何物佛言此舍之龍佛又告言汝言此舍有是毒龍

人不敢止我今降伏收於鉢中汝可審觀了知其實
烏嚕尾螺迦葉自以耆年德重行苦學優凡所見知
無有過者及見世尊龍火不傷又能降置鉢內乃讚
歎曰奇哉沙門有大威力我所見聞希有此事是大
沙門是大丈夫亦是阿羅漢爾時世尊降毒龍已至
第二日即於烏嚕尾螺迦葉任處不遠就一樹下經
行宴坐即於是夜有四大天王下來聽法時迦葉夜
出觀於星象乃見佛前有四大火聚迦葉即謂諸弟
子曰彼大沙門亦事於火諸弟子曰師何由知迦葉
告言我夜觀星象乃見大沙門前有四大火聚我知

沙門事火無疑時烏嚕尾螺迦葉纔至天曉速請佛
所而白佛言汝大沙門亦事火耶佛卽報言我不事
火迦葉又言我夜中觀星見沙門前有四大火聚若不
事火此乃何用佛卽報言此非是火是四大天王下
來聽法是彼四天身光之耳迦葉驚曰竒哉沙門有
是事也此大沙門有斯威德感得天王俱來聽法此
亦是阿羅漢耶至第三日帝釋天王乃於夜分來至
佛所頭面禮足退坐一面佛爲帝釋如應說法帝釋
天王得聞法已歡喜踊躍還歸天宮時烏嚕尾螺迦
葉夜觀星象又見樹下世尊前面有一火聚極大熾

盛光明照耀如日初出而彼迦葉謂弟子曰而此沙
門定事於火至天曉已與諸弟子速詣佛所而白佛
言汝大沙門我昨夜出觀於星象又見火聚熾於座
前火光上騰如日初出我今定知沙門事火佛卽報
言我非事火昨夜帝釋下來聽法是彼身光之所照
耀迦葉歎曰竒哉沙門有大威德此實希有我今定
知亦得阿羅漢果至第四日烏嚕尾螺迦葉出門觀
星又復觀見沙門座前有大火聚光明照耀如日正
中是時迦葉還告弟子我於今夜又觀星象復見沙
門座前有火光明照耀轉倍於前如日正中等無有

異審察是相定事火也至天曉已行詣佛所而白佛
言我夜觀星亦見沙門座前有火我知沙門定事火
也佛言迦葉我無所求何用於火昨夜之中彼娑婆
世界王大梵天王下來聽法在我前坐汝所見者是
彼身光時彼迦葉還復歎曰此大沙門乃有如是大
威德力能感梵王下來聽法實爲希有我定得知亦
證阿羅漢果至第五日時烏嚕尾螺迦葉弟子摩拏
嚕迦等五百人衆俱事三火各有三鑪其鑪共有一
千五百是時世尊在彼樹下又值彼衆用火祭天彼
五百人常式發火火不能然彼弟子衆卽速告師至

烏嚕尾螺所而白言曰師可知否我等然火火終不
然不知今日何因若此烏嚕尾螺迦葉思惟是事而
彼沙門在此近任恐彼威力而有所制卽與弟子同
詣佛所而白佛言汝大沙門我之弟子摩拏嚕迦五
百人衆常式用火而爲火祀今旦然火終不能著我
疑此事定是沙門威力所制佛卽答言汝欲火然迦
葉答言欲然佛言汝去火當自然迦葉還家火已然
矣時彼迦葉及與弟子皆稱讚曰此大沙門有力如
是必應亦得阿羅漢果用火祭訖欲滅其火火不能
滅盡其彼力終不能滅摩拏嚕迦諸弟子等疾詣烏

卷六
摩訶薩婆經
卷六
嚕尾螺迦葉之所自言我師知否火雖得然今不能
滅迦葉報言此必還是沙門所爲迦葉復來至世尊
所自言沙門火雖得然今不能滅莫是沙門而復制
也佛卽報言汝欲滅耶迦葉告言欲令火滅佛言汝
但還去火必自滅迦葉迴還火已滅矣又復歎曰此
大沙門有是神力亦阿羅漢也至第六日烏嚕尾螺
迦葉自欲用火祭其火天火又不然卽自入定欲令
火然火亦不然來至佛所而白佛言我自用火常式
得然今不能然莫是沙門力所制也佛言迦葉汝欲
火然答言欲然佛言但去火必自然迦葉迴還火已

然矣用火事訖欲滅其火火又不滅又復入定欲令
火滅火終不滅事不獲免來白佛言火雖得然今又
不滅必是沙門力所制也佛言汝欲滅耶迦葉告言
欲令火滅佛言但去火必自滅及至還家火已滅矣
火滅已後以彼餘炭積於一處移時之後其炭自然
與諸弟子同滅其火盡其力分終不能滅又來白佛
汝大沙門火適得滅今還自然熾盛倍常我不能滅
此必沙門力所制也佛言火又然耶答言火然汝不
能滅耶答言我不能滅佛卽報言汝但迴去火自息
滅迦葉卽迴火已自滅迦葉歎曰奇哉沙門有斯力

也我欲然火不能然告以得然我欲滅火不能滅告以得滅今火再著不能再滅今火得滅亦由彼力是大沙門有大威德此實希有必應亦是阿羅漢也過是日已烏嚕尾螺迦葉作外道法設七日會彼摩伽陁國王仕庶皆悉聞知迦葉思惟今大沙門在此近住前所火祀皆能力制今所作法莫復制耶若彼沙門七日不來我法必成若復來者或恐被制又作是念彼大沙門相好端嚴威德殊勝國中仕庶若見殊勝或恐捨我而事於彼以斯事故思念再三佛卽尋知佛於七日他處遊化雖在近住迦葉及衆於

七日中不見世尊時彼迦葉作七日法國中仕庶悉持香花及與財寶廣作供養作法既畢設會亦終却復思念彼大沙門七日不見我今設會多有餘長沙門若來甚有供養作是念已佛知其意卽便行詣迦葉在處迦葉纔見心卽歡喜此大沙門我思便至乃白佛言沙門來耶佛言我來又曰七日之中何以不來佛言汝作是念我設七日法會若彼沙門來者恐法不成我知汝意是以不來今汝思念作法已畢沙門若來甚有供養我亦知爾是以此來迦葉思惟此大沙門是大聖者悉知我意必定亦是阿羅漢也佛

與迦葉言論已竟尋還所止迦葉於後以虔潔心造
諸飲食極令香美異其常品待至來日自詣佛所白
言沙門我以專心備辦食竟願過我舍而受供養佛
受請已而告之曰汝但先去吾當便至迦葉既去世
尊入三摩地猶如壯士屈伸臂項於瞻部洲界取瞻
部樹果盛滿鉢已迴還先至迦葉任處踟躕而坐迦
葉後至見佛先到驚而言曰沙門來耶佛言我來久
矣迦葉又言從何道來佛即報言我從任處往瞻部
洲界取瞻部樹果還來於此迦葉言大沙門乃有如
是神通迅疾於少時能往於彼取果還來此大沙

門亦是阿羅漢也佛即以果示之迦葉汝曾見不迦
葉言我未曾見佛言汝樂食不答言樂食佛言隨意
迦葉食果歎未曾有食果已竟即以所造種種飲食
自手奉上佛喫食已澡漱亦畢即爲迦葉說偈祝願
訖尋迴樹下又第二日請佛受供佛即依前入三摩
地往弗婆提取菴摩羅果先至迦葉任處又第三日
請佛受供佛入三摩地往西衢陀洲取得尾螺迦閉
他果還來先至迦葉任處至第四日請佛受供佛即
入三摩地如屈伸臂項往北俱盧洲取自然米飯鉢
中持來先至迦葉任處安坐已久迦葉方來迦葉又

問自何道來佛答迦葉我適往彼北俱盧洲取自然
米飯持來至此迦葉歎曰此大沙門有是神通必是
亦得阿羅漢果佛還問言北洲之飯汝樂食耶答言
樂食佛言隨意迦葉食已歎未曾有於是自所辦
種種飲食奉上於佛佛受食竟澡漱亦畢卽爲迦葉
說偈祝願已還歸樹下世尊來日乃自持鉢往四天
王天直至忉利天取天酥味還來所止樹下而食喫
食旣畢思水澡漱帝釋天主知佛思水如展臂頃來
至佛所白世尊言欲水用耶佛言欲水帝釋卽觀近
地先有涸池以手指之水卽湧出清淨香潔無與等

者佛卽澡漱隨意受用帝釋天主還歸天宮迦葉忽
見驚恠非常而此涸池無水已久今復水滿不知何
來速至佛所而白佛言大沙門此池久涸水因何有
佛卽報言今日食畢無水澡漱帝釋遙知乃下天來
爲我出水迦葉歎言未曾有也食從天取水令天出
能感如是此必亦得阿羅漢也迦葉乃立池名謂之
播拏佉多佛於後時入池澡浴池岸之側先有大樹
名阿祖羅曩佛以袈裟挂於樹上迦葉來至見佛袈
裟挂於樹上知佛澡浴卽來瞻覩佛旣浴訖出水上
岸卽展其手欲攀樹枝時阿祖羅曩枝便低亞迦葉

乃見還復歎曰此大沙門實不思議感得無情自然
低亞沙門亦得阿羅漢也世尊後時思欲洗衣云何
得石而爲用耶帝釋遙知尋至佛所白言世尊佛欲
洗衣而用石耶佛言要石帝釋卽令夜叉於大山中
取石一塊脩令平正復使光潔置於池側佛卽洗衣
洗已欲睽帝釋又令夜叉別取一石置於池岸佛洗
衣竟就石睽之迦葉來至又見池岸忽然有石乃自
驚惟池岸先無今從何來而白佛言大沙門池岸之
石自何而有佛卽報言我欲洗衣爲無石故卽起思
念帝釋下來爲我安置我又思念無處睽衣彼天帝

釋又安一石二石所來皆帝釋也迦葉大歎此大沙
門凡是所作非世之有必已證得阿羅漢也然其所
證應莫超吾迦葉之心似有省悟世尊又以方便更
現異相教化迦葉令入正道佛卽化彼尼連河水忽
然汎溢居河左右人多漂溺枯涸陂池處處皆滿佛
所止處正居其內佛以神力令水環遶四面壁立中
心塵起迦葉是時見河汎溢最盛於常卽思念言彼
大沙門得不漂溺由是乘船速至佛所乃見世尊樹
下經行步步塵起又以環水壁立不能下船歎異倍
常遙相慰曰沙門安否得無憂惱耶佛言我無憂惱

勞相論也復思念言此大沙門自有神通何不離此
迦葉又言莫欲乘船離於此耶佛言欲離於此迦葉
白言若欲離者當自上船佛以神力如彈指頃已在
船中踟蹰而坐迦葉見佛已坐不見所來所入迦葉
歎言沙門是大丈夫有大威德乃有神通能如是也
迦葉白言我自亦得阿羅漢果然不及沙門所證之
道佛知迦葉決定迴心便即告言汝自言證阿羅漢
者非實證也迦葉忽聞世尊發如是語身毛皆豎轉
自尅責此大沙門悉能知我種種之事今宜師之以
進其道作念已定而白佛言大沙門願知我意今欲

於大沙門法中出家而爲僧伽稟奉教勅脩持梵行
唯願慈悲特賜聽許佛知迦葉證道時至又以方便
化彼徒衆乃謂迦葉曰汝欲於吾法中出家學道爲
沙門者還曾令諸弟子悉知以否迦葉答言弟子未
知佛言汝爲人師不得卒暴且可歸還與弟子議若
謂然者即可再來斯亦未晚迦葉奉教還至住處乃
與摩拏躡迦等五百弟子同集一處告而言曰彼大
沙門相好異常神通難及凡所動止天悉遙知或來
座前而聽其法或有要用皆能給送累見神變我實
不如今欲師彼出家用進其道吾已決定汝等如何

細自籌量以實報我摩拏轉迦白迦葉言彼火龍暴
惡首先降伏神異他心衆人目覩我等所業悉自師
傳師既未如弟子何說師若決志我等皆隨師若達
彼宗源亦願垂於濟度我等已決衆共一心今或可
行不可失也於是迦葉知衆誠願乃令弟子取事火
具護摩杓等種種之器及鹿皮衣樹皮衣淨瓶拄杖
革屣等物悉棄尼連河中以示不迴之相師徒相率
同詣佛所頂禮佛足退立一面

爾時世尊謂迦葉曰汝復來耶迦葉答言今與弟子
同來欲於大沙門法中出家脩學佛已懸知乃更審

曰汝諸弟子誠心以否迦葉答言我與弟子皆悉誠
心唯願慈哀咸垂濟度佛卽默許度爲沙門又復報
言汝等今朝是真出家是真梵行披袈裟衣而實沙
門爾時烏嚕尾螺迦葉身著袈裟成沙門相又聞佛
言汝今是真出家是真梵行私自慶喜我心全滅又
復思惟往昔大仙嘗說斯事世稀有佛出興於世得
無上覺具一切智是大聖人天上人間悉能利樂我
於前時夜出觀星有大火聚謂其事火與我同宗乃
是梵王帝釋四天王等互來聽法今惟此事是大聖
人此非大聖孰爲聖也於是迦葉易沙門稱呼佛爲

世尊

佛說衆許摩訶帝經卷第九

終

海陽佛弟子金星煥

助刻

衆許摩訶帝經第九卷

計字五千七十六個

該銀二兩五錢三分八厘

伏願

六根雪淨三障水清生生啟悟妙心世世弘開道

眼

崇禎九年季夏月徑山化城寺識

佛說衆許摩訶帝經卷第十

宋真鑿經藏朝散大夫試鴻臚少卿明教大師星漢

詔譯

爾時烏嚕尾螺迦葉有其二弟一名曩提迦葉一名

誡耶迦葉是二迦葉各有二百五十學徒悉在尼連

河下流岸側而住各於師法勤加脩習是二迦葉一

日於尼連河中忽見烏嚕尾螺迦葉祀火之具護摩

杓等及鹿皮樹皮衣乃至淨瓶拄杖革屣等物悉從

尼連河中流下乃驚恠思念我兄迦葉得無王難耶

得無賊難耶乃至水火等難因是難故退失脩行若

不爾者云何祀火之具種種之物棄於水中任自流

下審知今日必見差異於是二弟思議再三共行尋
兄原其的實至兄住處不見迦葉及弟子輩唯餘所
居空寂而已時二迦葉倍極悽然即詣隣人訪其所
以隣人報言烏嚙尾螺捨棄仙道將諸弟子歸於沙
門我等諸人不知其事請自詣彼詢其因由時二迦
葉聞此說已互相謂曰我亦聞有沙門近來此處凡
諸舉止皆異常人儻或我兄及與弟子若實然者極
爲稀事今可往彼自觀虛實二人相將回到佛所方
見其兄烏嚙尾螺及與弟子披袈裟衣成沙門相悉
坐佛前瞻仰聽法時二迦葉自覩斯事因知其實心

驚毛豎足不能進佛見曩提誡耶來尋其兄又見立
於會前足不能進即遣烏嚙尾螺自起迎接時二迦
葉既覩其兄離席迎接即趨進前來禮足問訊二迦
葉言我兄者年有德久已脩行博學該通世無等者
摩伽陁國王及大臣乃至士庶皆謂我兄證阿羅漢
道常持種種香花飲食上妙衣服及以珍寶而來供
養凡有言說莫不諦信如何今日忽棄已道便隨他
教我本脩行依兄指授乃至弟子咸無異轍兄今自
棄本所脩習我等云何更堅進趣處大疑網願賜開
解作是說已顯住一面

時烏嚙尾螺迦葉告曩提誡耶等言往世無佛猶若
冥夜人無慧目不知沉墜我於是際苦節脩行事火
爲功每祈聖證復以此道轉教汝曹餘人無能得過
我道便卽自謂證阿羅漢有大沙門曰佛世尊身長
丈六金色晃耀相好具足威德特尊哀愍我故來近
止住凡所動靜天悉遙知四大天王乃至楚釋咸來
聽法又見神足於刹那頃往復四洲乃至天上取酥
陀味悉皆示我又復知我實未證得阿羅漢道以斯
事故我道不如省悟宜先誠慙後悔乃與弟子投誠
出家哀愍我故便垂救濟令著法服度爲僧伽先不

告汝吾之過矣

時曩提迦葉誡耶迦葉根緣已熟便生信向聞是語
已悲喜交至乃謂兄言我本脩行因兄教授兄今棄
捨我亦願隨又復言曰無佛出世寧聞正法雖止老
耄亦希出離烏嚙尾螺告言善哉善哉今正是時曩
提迦葉誡耶迦葉卽前詣佛頭面著地禮雙足已退
任一面白言世尊我兄烏嚙尾螺先是本師今者出
家已爲沙門我今亦欲出家願賜濟度佛雖默許還
令導彼徒衆而告之曰汝等弟子悉知以否二迦葉
言未知佛言汝可令知還來度汝時二迦葉承佛教

勅還歸所住各集弟子告而言曰摩拏嚙迦汝還知
否有大沙門其名曰佛來近我師迦葉止住累以神
通顯現異相皆令我師一一目覩又以法力制其所
作我師省悟知法不如將諸學衆投彼出家我因見
其所棄受用隨水流下乃自訪尋委其緣由及到於
彼已見我師迦葉及五百弟子悉著袈裟成沙門相
在會而坐聽其說法我見是事初大驚怖不能前進
我師迦葉離席來迎具說前事我聞殊勝亦願出家
載念汝曹迴來相報吾意如此汝等思之以信實心
各報於我彼二迦葉說是語已時摩拏嚙迦弟子之

衆白迦葉曰我等脩學從師所受師辯勝劣弟子寧
知師尚投彼出家我等云何執守如或決定亦願相
隨於是曩提迦葉誡耶迦葉各領弟子同詣佛所至
佛會已頂禮佛足退住一面

爾時世尊告迦葉言汝等來耶時二迦葉答言已來
又白佛言我等各將諸弟子同來投佛於正法中
願得出家稟奉尸羅脩持梵行願佛大慈哀愍聽許
佛卽攝受度爲沙門佛又報言汝等今朝是真出家
是真梵行時迦葉等聞是語已歡喜踊躍不能自勝
各各禮佛旋繞畢已瞻仰而住

爾時世尊度迦葉等千苾芻已卽離適悅之地將耆
年迦葉等一千苾芻往誡耶山頂塔處經行到誡耶
已佛爲諸苾芻等現三種事一者神通二者說法三
者調伏於是世尊入三摩地現神變相於本座沒而
於東方虛空之中現行任坐卧四威儀事又於身上
出五色光所謂青黃赤白及與紅色又復身上出水
身下出火身上出火身下出水乃至南西北方皆現
是相見神變已於剎那間還復本座爾時世尊又與
說法謂諸苾芻汝於心意識等諸法之中有疑無疑
有念無念可滅不滅於斯諸法汝決定行又復告曰

汝等當知眼識爲緣貪於諸色因色觸故內心發生
卽有苦樂或非苦非樂乃至耳鼻舌身意亦復如是
諸苾芻貪火旣爾嗔癡亦然由是輪迴生老病死憂
悲苦惱諸苾芻三火熾盛由我爲本欲滅三火當斷
我本我本若斷三火自息於是三界輪迴一切諸苦
自然斷絕時三迦葉及千苾芻又蒙世尊現神變相
及說正法得諸漏盡得心解脫所作已辦捨諸重擔
正得已利永斷輪迴悉皆證得阿羅漢道

爾時世尊於誡耶山頂度三迦葉及弟子千人皆證
阿羅漢道已時民彌婆囉王及輔相大臣乃至士庶

悉知世尊在誡耶山頂有弟子衆數滿千人有一大臣告於王曰我聞國人近有言論彼釋族中生一童子初生之時有雪山邊姿礙囉體河岸往昔迦毗羅仙住處有一善相婆羅門相而言曰今此童子相好具足福慧圓滿必爲金輪聖王王四天下盡大海際悉在統御正法理世民行十善復有輪寶摩尼寶女寶王兵寶王藏寶象寶馬寶如是諸寶自然出現恒常隨逐又有千子色相第一具大勇猛能破怨敵四洲畏威悉皆降伏然或出家剃除鬚髮著袈裟衣正心修行必成無上正等正覺具以上事悉白於王請

早圖謀勿令後悔如能殺者保國終吉時民彌姿羅王在正殿上獨坐思惟常念五種之事一者常願如來應供正徧知明行足善逝世間解無上士調御丈夫天人師佛世尊出於世間二者早得往彼瞻禮隨喜三者到已便得聞法四者如所說法悉能了知五者爲我受戒受已稟持方念斯事忽聞大臣計議之言傷嘆良久報而言曰汝實愚人欲於如來起極惡心是大愚癡汝可速去勿更發言時彼大臣聞是語已知不聽從慙懼而退爾時民彌姿羅王卽顧左右親位大臣福相圓滿有智慧者而告之曰汝去往彼

誡耶山頂世尊之所代我恭敬而請世尊如我辭曰
民彌婆羅王稽首雙足恭肅無量問訊世尊少病少
惱起居輕利安樂行否今請世尊降臨宮城微受供
養當使於我及彼人民獲大利樂唯願世尊及與聖
衆耆舊大德皆悉降臨當盡此生奉以飲食湯藥乃
至卧具及僧伽梨等一切供給不使乏少願大慈悲
無辭勞屈如是說已頂禮佛足顯聽聖旨佛卽默然
時彼使人知佛受請作禮旋繞辭已而退爾時民彌
婆羅王聞使迴旋速御前殿受使朝拜君臣禮畢遽
發問言世尊來耶使人近前而奏王曰臣奉王旨請

誡耶山請佛及衆具以王旨白於世尊佛已默然必
來降赴時王降勅左右大臣便可嚴潔宮殿及與城
隍乃至四衢悉令清淨復設種種名香妙花以備迎
接爾時世尊與耆舊迦葉及千阿羅漢離誡耶山詣
於王城去城不遠有杖林塔佛與大衆至塔而任時
民彌婆羅王得聞世尊與諸聖衆至杖林塔安任已
定卽令所司嚴整車駕前後導從與自眷屬及諸群
臣欲出於城詣杖林塔所出宮未遠王所乘車地忽
有坑輪陷不進王自思念我必往昔曾造不善致於
今日有斯事也纔起是念卽聞空中有聲告曰汝與

往昔無不善業但爲現在諸牢獄中多有禁繫車輪之陷正爲此也王聞空言定知賢聖旣蒙指諭心極感重卽遣使人散詣諸獄以罪輕重等第赦之車駕前進至於城門王之寶冠又忽破壞復思念言我定往昔曾作不善乃於今日疊有不祥王發是意空中賢聖又復告言天子汝於往昔無不善業但緣前來所放禁繫之人輕者已放重者雖活猶繫別處冠破之祥乃爲此也王聞賢聖空中語已便令使人諸處詔喚咸到車前悉赦宥之罪人獲免歡喜踊躍稱王之德時王部從及諸眷屬所乘之車有一萬二千復

有國中婆羅門長者及諸人民亦有百千車同出城門詣世尊所時王至杖林塔於近苑內取迦俱那花五朶自手執持詣於佛所去佛不遠下車徒跣去去傘蓋劔仗之類使令相隨旣至佛所偏袒右肩合掌向佛三自稱言我是民彌婆羅王佛亦三印如是如是王卽以五朶花奉上於佛然後頭面著地禮其雙足又以種種言辭而伸讚歎佛卽報言請王就坐王昇座已其王眷屬及婆羅門長者士庶等次第禮佛歡喜踊躍各各以偈讚於世尊讚詠畢已却住一面時烏嚕尾螺迦葉先是王及大臣一國士庶所尊重

者今爲沙門侍立佛側王及人民莫不疑恠咸起念
曰耆年迦葉事火修行勤苦彌久智慧道德皆出人
右今在衆會生我等疑爲是如來奉迦葉教耶爲是
迦葉奉如來教耶作此念時佛卽玄鑒乃謂迦葉曰
汝自知時迦葉承佛聖旨不起於座入三摩地於本
座沒現於東方作行住坐卧四威儀相又復身放光
明而有五色所謂青黃赤白紅其色間雜猶如玻瓈
又復身上出水身下出火身上出火身下出水南方
西方乃至北方皆亦如是現神變已忽然之間還來
衆會合掌向佛說伽陀曰

我本修行	奉事於火	彌歷年歲	疑設勤勞
心常自謂	已證羅漢	執著我相	不能解脫
佛大慈悲	而來濟度	制火不然	又令不滅
初謂同我	亦事於火	言無所求	事火何用
天上人間	無所愛戀	我設法會	爲求利養
欲來不來	皆知我意	又於四洲	及彼天界
取果及飯	悉於我食	我執事火	迷於正行
猶若盲者	復如死人	無有見知	定趣墜墮
摩訶牟尼	猶如大龍	布精進雲	灑甘露雨
利益一切	有情無情	我欲出離	求作沙門

蒙佛大悲

說清淨法

於最上句

使令知覺

我今實證

阿羅漢果

佛爲我師

我是弟子

諸人當知

勿生疑念

此誠實言

宜應諦信

爾時迦葉說伽陀已頂禮佛足還復本座時會大眾
王及人民實知迦葉是佛弟子佛知衆會疑心已息
乃謂王曰我今爲汝演說法要汝當諦聽善思念之
王及衆會受教而聽佛言大王汝今當知如王身色
有生有滅當審觀察生滅二相令實了知復觀受想
行識亦同於色善男子若能於此如實了知是生滅
已當復觀察是非生滅若能了知色非生滅卽知受

想行識亦非生滅善男子色受想行識本非生滅無
去無來若能如實了知本非生滅無去無來亦復不
住非生非滅無去無來大王若於此法如實知已卽
得無數阿僧祇寂滅之法時彼會衆一切婆羅門長
者士庶中有生疑念者世尊今說色受想行識本無
者云何有我相人相衆生相壽者相布捺譏羅相摩
拏嚩迦相主宰承事等相若此我人衆生壽者等相
亦實無者云何知彼衆生所作善不善業二種因果
捨此蘊已復趣他蘊

爾時世尊知彼衆中起心念已卽謂迦葉等曰諸苾

經
總
卷之三
十
有六
芻所有我人衆生壽者等見乃是凡夫愚人若有是見當感其苦若知苦生當求苦滅諸芻種種有爲因果之法乃從種寂而轉生故我自知已欲令衆生於生滅法亦同我知諸芻芻佛眼清淨過於天等所有衆生好相惡相及生貴賤善願惡願隨衆生業我今一一如實了知衆生身業具如是事口業具如是事意業具如是事略說衆生邪見起於邪業或於佛法而生毀謗由斯業故命終之後墮於惡趣備受衆苦諸芻芻若有衆生於其身口作諸善業具正見正行正業而於佛法常欣讚譽由斯善故命終之後生

善逝天諸芻芻我有如是知見非不能知我相人相衆生相壽者相布施誑羅相摩拏嚙迦相乃至主宰承事等相或諸所作善惡因果捨此蘊已復趣他蘊如是等事亦無所有我先已說種種有爲因果之法從因發生從因得滅所謂因於無明緣生於行行緣生識識緣生名色名色緣生六入六入緣生觸觸緣生受受緣生愛愛緣生取取緣生有有緣生生生緣生老死憂悲苦惱以是因緣得一大苦蘊生諸芻芻若滅其因一切皆滅所謂無明滅則行滅行滅則識滅識滅則名色滅名色滅則六入滅六入滅則觸滅

觸滅則受滅受滅則愛滅愛滅則取滅取滅則有滅
有滅則生滅生滅則老死憂悲苦惱滅如是則一大
苦蘊滅諸苾芻集因滅故苦自然滅若苦止息得涅
槃樂又復我相永斷正滅非轉了苦非有滅云何滅
是得止息是得清涼離一切句是則涅槃

佛說衆許摩訶帝經卷第十

音釋

翌 逸織切翌所賣切 杓是若切把儻坦朗切或日明日也 曝曝也 助刻

湖陽佛弟子金星煥 衆許摩訶帝經卷第十 針字四千二百六十個 該銀二兩一錢三分

梁武帝九年季夏月經山化滅

佛說衆許摩訶帝經卷第十一

宋西天譯經三藏朝散大夫試鴻臚少卿明教大師慧賢奉 詔譯

爾時世尊復謂民彌娑囉王曰汝觀色是常非常耶
王曰非常佛言是苦非苦耶對曰是苦世尊又言受
想行識是常非常耶對曰非常又曰是苦非苦耶對
曰是苦佛言色受想行識悉是非常是苦是顛倒法
一切無我佛又告言大王當以正智正慧觀其真實
彼色受想行識有過去現在未來耶有內外麤細貴
賤遠近耶對曰色受想行識非過去現在未來亦非
內外麤細貴賤遠近等佛言善哉大王若能於此五

蘊如實了知是非常苦空無我之法復以正智觀其
眞實知非過去現在及以未來乃至內外麤細貴賤
遠近等又能不著不捨者斯眞解脫大王得斯解脫
者是智解脫梵行已立所作已辦我生已盡永不復
趣輪迴之道

爾時世尊說是法時民彌姿囉王及八萬天人遠離
塵垢得法眼淨及有婆羅門長者士庶等百千人衆
亦離塵垢得法眼淨於是民彌姿囉王得法知見已
於法堅固斷其貪愛除去疑惑正信不退卽從座起
偏袒右肩合掌向佛白言世尊我心柔順歸依佛法

及以僧伽持近事戒永不殺生今請世尊常住我國
願盡形壽奉上衣服飲食卧具湯藥常無乏少乃至
聖衆盡生供養佛卽默然時王見佛默然受請歡喜
踊躍不能自勝卽以頭面禮佛雙足旋繞畢已辭別
而退

爾時諸苾芻衆見民彌姿囉王蒙佛世尊爲說妙法
不起於座遠塵離垢得法眼淨心皆生疑此王云何
遇佛世尊便得聞法證法眼淨除去塵垢作是念已
佛卽玄知告而言曰諸苾芻此民彌姿囉王乃於過
去作大善業所作決定果報無差今爲人王具大福

德乃宿世因感果如是諸苾芻地水火風外界熟時
蘊界六根一切好醜隨其所作善惡之業悉皆獲得
果報不虛爾時世尊卽說偈言

衆生之所作 善惡經百劫 因業不可壞
果報終自得

諸苾芻過去世時有佛出世名阿囉曩毗十號具足
爲人天師時佛世尊爲諸衆生說種種法化利畢已
卽入涅槃彼諸弟子收其舍利擇清淨地建立妙塔
復以種種香花而恒供養過是已後久歷年歲有轉
輪王出於世間名羯里計時有兵衆十八俱胝常領

是衆飛空巡幸復有七寶常爲先導後於一日經過
塔上有虛空神捉其輪寶任空不進時羯里計王思
惟是事今我方行輪寶自任恐是福盡感應斯現彼
虛空神乃告之曰大王汝非福盡下有阿囉曩毗佛
舍利塔端指輪寶不得直進時羯里計王與十八俱
胝飛空兵衆同時降下詣於塔所王及眷屬各以妙
衣共拭佛塔得清淨已散諸妙花及焚寶香又作種
種音樂而爲供養以頭面禮發其誓願以我今日師
事於佛所設供養種種功德果報不虛當來獲得諸
苾芻於意云何彼羯里計轉輪聖王并諸眷屬者卽

民彌娑囉王及眷屬等是諸苾芻以彼供養阿囉曩毗正覺之塔種種功德當感無數百千俱胝劫受天上人間最上快樂以本願力今值於我復作供養所獲功德乃與阿囉曩毗正等正覺平等無異諸苾芻一切衆生作黑業者黑業相續作白業者白業不斷或作雜業亦復如是諸苾芻所獲果報悉從因業汝等當知廣爲人說爾時會中諸苾芻衆以民彌娑囉王見佛聞法遠塵離垢又聞說彼往昔之事乃於烏嚕尾螺而起疑心云何世尊爲現神通種種教化方得迴心彼曩提誡耶隨言受化佛大慈悲具一切智

必能斷除我等疑惑作是念已將欲發問佛卽告言脩因感果定不虛爾諸苾芻過去劫中人壽二萬歲時有佛出世名曰迦葉如來應供正徧知明行足善逝世間解無上士調御丈夫天人師佛世尊彼佛亦在波羅奈國鹿野苑中作大佛事化利畢已卽入涅槃時世有王名羯里計常於彼佛恭敬供養佛旣入滅王以種種香木茶毗世尊復以乳汁灑滅餘火卽收舍利貯四寶瓶又選勝地起大寶塔其塔高聳量一由旬王及人民常作供養時彼國中有一長者家中巨富等毗沙門天眷屬衆多自在快樂先與別族

長者而爲朋友常於佛塔廣興供養後娶其門以爲
姻戚歲月綵久乃生三子於後長者年耄有疾服藥
不差漸漸羸困乃趣無常三子以禮葬於尸林是時
三子思憶訓誨且暮啼泣又念家富共議追福長兄
慳愞先未知善忽聞欲施初卽遲疑以孝存心尋便
允可長兄言曰布施之外分充受用二弟應諾卽持
金銀種種財物詣於塔所作最上供養如是施已同
發誓言願以善根所生果報於當來世以今正等正
覺迦葉之稱爲其姓氏佛出世間亦得值遇聞法信
解證於菩提發誓願已禮拜旋繞歡喜而歸是故迦

葉今得此姓值遇於我而爲沙門復聞正法證無學
果諸苾芻烏嚕尾螺初難化者以彼宿世欲檀施時
心有遲疑是故我現種種神變方得省悟曩提誡耶
而易化者亦由往昔檀施之時心本清淨始終無異
諸苾芻是故烏嚕尾螺及曩提誡耶復爲兄弟得迦
葉姓又值於我聞法證道此往昔事汝等諦信

爾時世尊說是迦葉往昔事已離杖林塔於王舍城
不遠就一樹下與千苾芻衆圍繞而住時民彌婆羅
王以佛近住欲立精舍安佛及僧而久住止民彌婆
羅王爲太子時常出城外而爲遊戲去城至近有一

園花林樹蒼鬱泉池清淨雖復四序花竹恒茂太子
愛樂而欲求買園主長者自恃者老無亦家富太子
逼取終不允從出言悖慢聞於太子我寧離此國不
捨此園太子聞已謂左右曰今此耆耄言甚不遜我
若紹位無得忘也於後父王摩賀鉢納摩崩已卽灌
頂傳寶號民彌婆羅王旣紹其位乃憶前事下令所
司發使奪取時彼長者速得心病便趣無常命終之
後以其憤怨積聚毒惡乃於園内生蛇趣中含毒伺
隙欲酬前恨後於一日王因春節將諸嬪媵遊幸彼
園盡極歡娛以肆其意王方疲困寢息園中時彼毒

蛇謂其得便疾出窟穴欲來蠱王時諸嬪媵散行遊
冶王有親近內侍一人執劍侍衛防其不虞時有飛
禽名迦蘭那迦飲啄翱翔常在園內忽見蛇出相呼
鳴噪執劍內侍見蛇出已卽斷其命禽衆極噪王亦
驚寤問執劍者緣何喧擾執劍者曰適有毒蛇欲來
蠱王迦蘭那迦相呼驚噪我旣目見已斷蛇命王聞
是語心驚毛豎令詔太子及諸大臣共議斯事古刹
帝利灌頂大王或於身命欲致危害有能忠力濟其
難者當何賞賜大臣對曰能於身命脫其難者可分
半國以賞其功王乃允從分其半國與迦蘭那迦用

賞其功大臣對曰彼迦蘭那迦飛禽之類與國境土當何所用王謂大臣此事如何大臣對曰可就窠巢多植竹木使其遂性勿令傷害如斯可矣餘不能爲王聞曰善遂從其奏乃於園外別擇一處廣種竹樹安迦蘭那迦令人守之不得傷害王有親舅本事仙道常來淨處進其脩習王以迦蘭那迦竹林無諸雜穢權令安處及見世尊將諸苾芻近城樹下露地宴息思欲捨彼造立精舍王乃嚴駕自詣佛所禮雙足已却住一面

爾時世尊爲王說法以種種方便化令歡喜復勸精

進當求最上寂靜快樂時王聞法歡喜頂受卽起於座偏袒右肩合掌頂禮白言世尊我今請佛及諸聖衆於我宮內來晨受食唯願慈悲哀愍聽許佛卽默然爾時大王見佛默然知已受請歡喜踊躍禮拜而歸乃下所司卽於是夜疾速備辦種種飲食及與香花皆令倍常美妙清淨復勅官城內外乃至四衢道巷之中悉使嚴潔纔至明旦卽遣使人白於世尊飯食已辦請佛降臨於是世尊與千阿羅漢著衣持鉢前後圍繞行詣王宮王於門首執爐焚香待世尊至佛既到已迎入就座諸聖衆等亦各就坐王與眷屬

瞻禮畢已奉上飲食焚香散花歡喜供養佛與聖眾
食畢澡手王及眷屬樂欲聽法佛爲說法各各諦聽
歡喜信受王復離座合掌白佛我今欲以迦蘭那迦
竹林作佛精舍願佛納受世尊默然王知佛許即取
金瓶灌於佛手奉施畢已願佛隨意卽爲世尊廣作
嚴飾佛與聖眾隨意而住迦蘭那迦竹林精舍因茲
所立

爾時世尊後於一時爲利樂故與諸聖眾離迦蘭那
迦竹林精舍往寒林中經行宴坐時王舍城有一長
者請佛及眾來晨供養乃於是夜與諸眷屬及僮僕

侍人共辦飲食香花等事時給孤長者因有事故到
王舍城經過彼家遇夜止宿見其長者家中老幼皆
不寢寐辦造飲食珍饌之類恠而問曰長者之家老
幼不寐辦造飲食當何所用爲請王耶爲請大臣莫
爲姻親而有聚會長者報言我不請王及大臣等亦
無姻親聚會之事今爲有佛出於世間將一千聖眾
遊化此國王及眷屬大臣士庶悉皆歸向次第供養
我爲彼佛及與聖眾來晨設齋是不寢寐給孤長者
聞此語已歎異非常又復問言云何名佛對曰彼釋
族中有王淨飯生一童子號悉達多具輪王相棄捨

出家苦行修習證得阿耨多羅三藐三菩提斯卽佛也又復問言云何聖衆對曰有利利族或婆羅門族乃至毗舍輪陀如是之族善男子輩投佛出家剃除髮鬚披袈裟衣正信修行聞法悟解悉皆證得阿羅漢道此是隨佛一千聖衆我所供養正爲此也給孤長者聞是說已身毛皆豎歡喜踊躍又復問言如我云何得見彼佛及與聖衆對曰明旦咸來我舍受食給孤長者雖聞是語有若心狂不待天曉欲往佛所時方半夜值月明朗卽便出門行詣寒林未至中途月忽雲蔽又至一門不敢前進給孤長者以天陰黑

便生怕怖佇立思量得無非人之類而來惱我耶心欲退還足不前進時有天人發聲告曰長者但去勿得退心唯有吉祥定無惱亂於意云何譬如百車百馬種種莊嚴可令衆生見者愛樂以斯布施不如向佛前進一步十六分之一分功德

又復告言長者但去勿得退心唯有吉祥無惱亂事於意云何譬如一百金象衆寶莊嚴以斯布施不如向佛前進一步十六分之一分功德長者乃至百童女以真珠瓔珞衆寶嚴身以斯布施亦復不及向佛一步十六分之一分功德時彼天人卽發身光照耀

途路自彼門所直至寒林如月盛明等無有異給孤
長者乃問天曰是何聖賢能作斯事天人告曰我昔
曾爲舍利子母名捺誡囉也命終之後生四天王界
今名摩度娑健馱摩拏嚩迦見守此門願勿疑慮長
者可去必獲吉祥給孤長者聞是語已讚言善哉稀
有斯事我今定去見佛無疑給孤長者又復思惟若
無正覺出於世間無由得聞最上妙法於是長者得
其光明無所障礙直至寒林世尊住處

爾時世尊在寒林外經行時長者見佛威德相好異
於常人即便合掌而發問言是世尊否佛荅言是長

者身心歡喜無量

又復問言世有何人而得安睡佛說伽陀而荅之曰

若人心寂靜 一切得安睡 若人繫染欲

熱惱心不止 染欲熱惱除 解脫無所繫

心意調伏已 得息得安睡

爾時世尊說伽陀已與給孤長者同入林中佛還本
座長者即前禮佛雙足於一面坐樂欲聽法佛乃勸
發令心歡喜

爾時世尊告長者言布施持戒得生天上雖五欲自
在非爲究竟欲免輪迴當斷煩惱於善惡法廣爲分

別是時長者得聞是法以宿善力深心思惟蓋障卽
除心喜無量佛知是已卽爲廣說苦集滅道四聖諦
法是時長者不起於座證四諦理如潔白衣易染其
色隨彼所染皆成上妙長者得法知見永斷疑惑於
佛法僧深信堅固卽從座起偏袒右肩合掌頂禮白
言世尊我今歸依佛法及苾芻衆持近事戒永不殺
生

爾時世尊問長者言汝何名字長者對曰我於國中
少有資產或是貧賈孤獨之人來丐求者我施飲食
及彼資具國人名我爲給孤獨汝國何名對曰舍衛

願佛及衆來降我國當以衣服飲食卧具湯藥一切
受用畢生奉施佛言長者我與苾芻數踰千人彼無
精舍何以安任長者對曰佛若降臨速當建立唯願
大慈不違我請佛卽默然給孤長者見佛默然知已
受請歡喜踊躍頭面禮足旋繞而退於是長者入王
舍城營構事畢將欲還家再詣寒林請佛及衆勿慮
精舍願早垂降言已還家自此日後一切皆停於舍
衛城周徧内外求覓殊勝清淨之地欲建精舍安佛
及僧唯有祇陀童子園苑最勝何以故此童子園其
地寬廣無諸穢惡行樹叢鬱泉池清淨寒風暑氣俱

不能侵又無蚊蚋含毒之蟲唯有吉祥飛走之類又復王城不遠不近非求法人不能到此若建精舍斯爲最勝思念已竟卽詣園王祇陀童子而告之曰童子勿恠我有勝事欲以上聞童子可容方敢陳說童子告言有事可說長者起立謂童子言欲買茲園當爲世尊及千聖衆造立精舍而請安住尊若容允價卽稟言祇陀童子告長者曰一切可得唯園勿言長者又曰我聞佛言一切無常無有王者以不堅法宜易堅牢童子報言非我所知勿復更說長者又曰佛者難值園卽易求今或遲疑後施無及祇陀童子雖

聞此說心未能捨乃以要言詭彼長者君能以金布滿其地我卽與汝任自所爲長者審知恐未誠信報而言曰童子若爾可聞市官當使兩情執無反覆童子俛仰共聞市官時四天王遙知斯事佛今出世舍衛城中給孤長者買祇陀園造立精舍兩人商議取正市官我今變身與成其事天王變身作市官已來於市肆顛望給孤與童子至二人至已給孤先言我買彼園欲造精舍令以黃金布徧其地若能爾者卽可相與今來取正此價云何市官言曰二人之心得可否未對言已定市官言曰善哉善哉童子收金長

者得園童子默然更無違悔長者即日速以車乘象馬之類乃至童僕搬運黃金處處布訖唯前面少許而未周足長者籌慮取何藏金可徧此地如是之際童子告言汝已迴意便可收金長者報言我意不迴思何藏金可徧此地以斯事故籌慮少時童子思惟竒哉長者能捨如是大財爲佛及僧造立精舍又復思惟我曾聞說若非正覺出於世間一切衆生不聞正法斯可助施理必相容卽謂長者勿更取金欲迴此地我施作門美可共成功亦圓滿長者報言我非無金童子爾者誠爲甚善布金纔畢方欲命工外道

悉知速來惑亂謂長者曰瞿曇沙門今在摩竭陀國王舍城居此舍衛城地貴名高非彼所任勿立精舍勿得迎請長者卽怒報外道曰此舍衛城非汝所有何關汝事外道聞已知不從心復詣於王王亦不允諸外道輩面慙無色心極煩惱復詣長者而告言曰我先所說不爲園死但以彼衆非我同修長者今日若是堅執斯有所報請不相違我聞瞿曇有大弟子先已到此可與論義卽辯勝劣如彼得勝精舍可爲若其不勝何用迎請我此所說君見如何長者告言此說甚善若定勝劣足得相依清濁要分眞僞斯辯

佛說衆許摩訶帝經卷第十一 終

音釋

高聳

下自 勇反 姻戚 上音因 下 綵 上綿字 鬱 上烏孔

勿反 一花

悖慢 上蒲沒 遜 蘇困反 憤怨 上房粉反

伺隙

下音色 遊冶 下音 飲啄 卓 翱翔 上音祥 徊飛也 嗚噪

下音色

窠巢 上苦和反 植 時力 貧置 反下位 丐求 上音

也

要言 阨 上音邀 一約也 俛仰 上音 顛望 上牛

也

下於 助交反 阻也 免 願望 上牛

歛

歛縣弟子海經 智隨 助刻

崇禎九年

季夏月徑山化城寺識 銀二兩五錢五分 計字五千七十個 該

佛說衆許摩訶帝經卷第十二

宋吳譯經藏朝散大夫試鴻臚少卿明教大師臣法賢奉 詔譯

爾時世尊在於寒林受給孤長者請預知舍衛國中
有諸外道各各苦行又復聰明雖勤修習不得解脫
根緣已熟受化是時世尊又觀誰可往彼唯舍利弗
乃有宿因此若先行必有大利於是世尊喚舍利弗
令先往彼舍衛大城助給孤獨建立精舍尊者受命
往舍衛城請長者所事皆叅議給孤長者承外道意
來白尊者彼欲論義於理如何又云此國之人素未
知佛於法勝劣宜其宣揚舍利弗曰善哉善哉斯言

誠諦尊者於是入定觀察諸外道輩及舍衛國人根緣成熟有幾時分見彼人衆唯餘七日尊者出定告長者曰請語外道過七日已可來論義長者具告外道思惟立七日限斯有二事一者知己非勝設計私逃二者或求本朋來共商榷如是思已我今云何不
求朋侶由是諸處親自訪尋乃得一人名赤眼婆羅門而告之曰彼瞿曇沙門有大弟子索我論義汝婆羅門應宜相助何以故若自得勝利養猶存彼或勝時我等何往彼卽問言何時論義報曰後當七日至時相報必來助汝然婆羅門憂其墮負心甚煩惱發

信諸處求告朋黨七日滿已給孤長者就寬靜處權立論場卽爲舍利弗尊者排師子座爲彼外道對排高座列座旣畢遠近咸集若公若私迨及少長有百千人集彼論處亦有別國外道婆羅門亦來會所給孤長者手執香爐焚以妙香與眷屬等同爲擁從迎舍利弗上師子座尊者坐定一切瞻仰觀其威容悉皆讚歎時彼外道與衆相隨亦昇高座安坐已定尊者告言汝欲何作外道言我現神通我旣現已汝當亦現尊者報言我所作者天上人間所不能作云何汝言能同我作尊者又言赤眼婆羅門汝所作者我

悉能破赤眼婆羅門化作花樹如實芳葩豔冶動衆
尊者神力出微妙風其花根苗吹散異處又化一池
水滿澄湛蓮花徧發人讚異常尊者化出大象膚體
端正入池蹂踐湏臾狼藉外道又化一龍而有七首
張鱗努目奮惡擎空尊者化金翅王從空飛下坐於
龍首龍自降伏時彼外道乃於最後化羅刹身立在
衆前醜惡異常人見恐怖尊者持咒神力縛之羅刹
苦惱翻生瞋怒外道驚怖身毛皆豎恐惡自傷發言
求救告尊者言我今歸依願賜救護尊者解呪羅刹
怒息時赤眼婆羅門得脫羅刹怖畏之難又復覺知

本所修習非是正行告舍利弗曰願於尊者正法出
家而爲沙門尊者大慈哀愍聽許舍利弗卽與攝受
度爲沙門後修梵行斷盡煩惱雖居三界而離貪毒
其心平等猶如虛空觀金如土而無別異於後修習
得三明六通證阿羅漢果乃得帝釋梵天而來供養
時大衆驚恠目注心疑異口同聲讚舍利弗是論義
師無人能敵猶如牛王處於衆群一切瞻仰無有馱
足時舍利弗知衆心意及其種性卽爲廣說苦集滅
道四聖諦法是會大衆有發三歸心者有發聲聞菩
提心者有發辟支菩提心者有發無上菩提心者亦

有出家證得須陀洹果有證斯陀含果有證阿那含
果有證阿羅漢果論義畢已會衆皆散諸外道中有
執性者以其論義不勝辱於屈伏潛共計議欲謀不
軌可投長者請作工人或得便時殺彼尊者設計已
定白長者言汝已斷我一切利養今者無所歸起却
願相愍收作工人或察卑心且住鄉土或不從允各
去他邦哀告再三傍不忍聽長者於是具述彼意白
舍利弗仁可思察於理如何舍利弗卽入三昧觀彼
根緣證道非遙遽云無患長者卽退錄其姓名遣作
工夫例與其直時舍利弗化出一人與工夫中便爲

首領尊者於後觀知根熟來彼役所就一樹下安詳
而坐時彼外道初爲得便各各心喜欲來親近而彼
首領執杖驅策不得前進役旣疲苦乃發聲言聖大
尊者救我救我舍利弗曰汝等疲勞可自歇息諸外
道言此大尊者我發殺心欲謀其命今亦知我而令
止息實自慙懼無以再言時舍利弗察其追悔又知
根性成熟時分乃呼近前便與說法卽爲演說苦集
滅道四聖諦法外道聞已所有身見如二十山峰以
金剛智悉破無餘應時獲得須陀洹果復言尊者欲
於正法出家爲僧舍利弗攝受度爲沙門漸漸進修

精持梵行見於輪迴趣其究竟斷盡煩惱證阿羅漢
果其心平等猶如虛空觀彼金土兩物不異棄捨世
利得大清涼當受帝釋諸天一切供養爾時舍利弗
化外道已卽與給孤長者共持一繩各執其頭量度
精舍都大界至界至已定給孤長者所感果報於毘
率天現金宮殿給孤長者不達聖意謂舍利弗曰今
此精舍不獨只爲諸阿羅漢我爲如來應正等覺舍
利弗曰我本所作正爲如來及阿羅漢又謂長者曰
汝此封地天報已現卽借天眼令其自見長者見已
驚喜無量於是復發上上品心舍利弗又自持繩一

頭令長者還執一頭於中分擘十六殿堂六十小堂
佛僧住處各各已定彼金宮殿變寶莊嚴尊者借通
復令觀見長者歎喜乃自歎曰我此所作當感如是
福德之利長者自見當來福報重重有異復更於事
轉倍精勤摩竭堂已及備其中一切受用精舍事畢
復白尊者世尊行住其量云何尊者報言用輪王儀
於是長者自舍衛國至王舍城每十俱嚙舍各造一
官以備如來止宿之地及置庫藏收貯一切所受用
物復令王者而恒守護以白檀水日日灑淨伺候如
來令其香潔處處如是皆使嚴備辦事畢已卽發一

人詣王舍城請佛及衆謂所去人汝到於彼代我詞
曰給孤長者稽首雙足白子世尊少病少惱起居輕
利安樂行否所立精舍今已嚴備願佛及衆愍念降
臨當盡此生奉上僧伽梨飲食湯藥并卧具種種受
用不使乏少佛正徧知願鑒虔切去人領意到於佛
所以長者言具白世尊復倍虔心而伸告請傳意已
畢五體著地禮佛雙足旋繞三市顛住佛前佛利樂
故默然許之去人知佛決定赴請速還舍衛見於長
者而白言云世尊默然必來降赴長者歡喜於是陳
列傘蓋幢幡名香妙花處處迎接

爾時世尊告諸大衆阿羅漢等可共往赴給孤之請
佛領大衆前後圍繞離王舍城請舍衛國瞻顧左右
告羅漢等我此眷屬是調伏是離欲是善解脫是阿
羅漢是佛眷屬譬如牛王處於衆群亦如象王衆象
圍繞師子王師子圍繞鴛王鴛衆圍繞金翅王金翅
圍繞又如衆學隨師衆病求醫衆兵輔將衆商依主
又如轉輪聖王千子圍繞持國天王樂神圍繞增長
天王鳩盤荼鬼圍繞廣目天王龍衆圍繞多聞天王
夜叉圍繞日天千光圍繞月天星宿圍繞帝釋天衆
圍繞梵王梵衆圍繞乃至復如悉帝彌魚處於海中

亦如海神攝聚衆水如來之身三十二相八十種好
具足圓滿光明莊嚴如千日光照耀一切行步巍巍
猶如寶山具足大悲十力四無畏等一切諸法爾時
世尊成就如是殊勝威德解脫眷屬次第行化至舍
衛國時給孤長者與其眷屬將諸侍人各各執持幢
幡寶蓋及妙香花出舍衛城遠迎世尊及大聖衆復
有國中長者士庶若男若女百千人衆亦來迎接又
有無數諸天在虛空中隨喜讚歎爾時世尊入城門
時卽以右足蹈其門閫於是大地六種震動放大光
明照耀世間天鼓自鳴雨衆天花所謂優鉢羅花鉢

捺摩花俱母那花奔拏里迦花乃至曼陀羅劫樹等
花又降沉檀及多摩羅等衆妙香糝又復舍中種種
音樂不鼓自鳴盲者得視聾者聞聲啞者能言不完
具者皆得完具迷醉者得醒食毒者自安相憎者和
解禁縛者解脫懷妊者得生男至貧者得豐資財世
尊入城之時乃有如是百千吉祥瑞應利益之事至
長者宅佛與大衆次第而坐長者所有若親若疎一
切眷屬皆來焚香散花禮拜供養種種畢已給孤長
者執爐焚香引佛世尊入於精舍佛昇寶座諸阿羅
漢亦皆就坐時給孤長者卽取金瓶欲灌世尊網縷

之手瀉水不出長者思惟我莫昔有不善業耶乃於
今日致有斯事佛告長者無不善業但爲此地汝於
過去正等正覺已曾捨施修爲精舍勿作任心今爲
能施若離此者水必流出長者對曰如佛所說作是
語已瓶水出聲具五功德灌佛手已願佛隨意又復
白言請爲立名時祇陀童子亦在佛會作是念曰佛
若知者先說我名佛應所思立精舍名號祇樹給孤
獨園祇陀童子得聞是已乃於如來轉倍發心歡喜
愛樂更以四寶莊嚴其門祇樹給孤精舍之名因此
所立

爾時舍衛國王勝軍大王聞佛遊化來入其國受給
孤長者請住於精舍歡喜踊躍請於佛所以種種語
讚歎世尊禮拜旋繞却坐一面作是言曰我聞瞿曇
沙門知自心相證得阿耨多羅三藐三菩提瞿曇沙
門依法喜論說彼所有心亦得名邪亦得名正亦可
作善亦可作惡而此心相無有去來不可知不可說
是甚深法云何可知佛言王所說者乃是真實而彼
心者亦得名邪亦得名正亦可作善亦可作惡而此
心相無有去來不可知不可說是甚深法我知是心
證得無上正等正覺王言瞿曇沙門云何乃作如是

之說彼有耆舊迦葉摩蹉梨娛舍離子散惹曳尾囉
致子阿唵多計舍劍末羅迦俱那迦旦也合野曩欄
誡囉陀倪也合帝子彼等亦知心相尚不證無上正
等正覺云何沙門少年始新出家言證無上正等正
覺佛言大王勿作是說世有四事不得輕慢何者爲
四一者王子不得輕慢二者龍小不得輕慢三者火
小不得輕慢四者僧小不得輕慢何以故而彼王子
生剎利種具足王相有大福德於後成長必紹尊位
愚人無智謂小可慢彼處寶位獲罪無悔又復龍者
稟性毒惡變現不恆或隱大身作小形質愚人不識

輕慢觸惱須臾恚怒翻被傷害又復火者能燒一切
或見微小不得輕慢人若輕者後必蔓延聚落山林
皆悉燒壞又復僧者清淨自守雖是年少不得輕慢
見道證果非止老幼亦復不擇久近貴賤世人無慧
不辯凡聖遇阿羅漢輕起毀辱所獲罪報如斷多羅
樹頭不得再生雖勤懺謝亦不除滅時勝軍王得聞
如來說是四法深心信受追悔言過卽以頭面禮佛
雙足懺謝旋繞歡喜而退

爾時世尊於舍衛國化利畢已思欲往彼迦毗羅城
時勝軍王承佛化導心堅歸向遂發使奉書上淨飯

王汝皇太子悉達多證得無上甘露法味於世出世間咸蒙濟度淨飯王聞已遽卽思慮雖喜我子已成正覺今若遣使定化出家以手搯頤再三詳審時有大臣名烏那曳曩見王如是而發問言大王云何搯頤不樂王卽報言我非不樂有所思事勝軍大王有書報我悉達太子已成正覺在舍衛國給孤精舍有千弟子皆阿羅漢我昔爲彼苦行去時發人尋求至今不迴今若遣使定是不復云何可知有如此事彼悉達多聰明智慧咸悉過人凡所言說誰不諦信我以此事而思慮之烏那曳曩卽曰王言臣今請行願

勿爲慮王曰唯汝一人我常在念若能爾者誠爲大善王卽親手而修書曰汝一切義成是我親子旣厭煩惱棄國出家爲求無上正等正覺已聞成道教化衆生思念之心日時相續令他人得樂唯我苦惱譬如大樹因地而生旣有根苗終望果實汝心已遂宜憶往願昔者所言若不證無上菩提寂靜之道誓不再入迦毗羅城大行已成宜應愍我及眷屬等烏那曳曩從王受書速至舍衛行詣精舍旣至佛所白言世尊父王淨飯致書於佛言訖捧上佛乃親受開封披讀須臾默然時烏那曳曩又白佛言今請世尊去

迦毗羅城佛言我去烏那曳曩卽五體投地方伸禮
敬禮已再禮以至於極又白佛言世尊若去斯亦無
言或不去者必堅請去爾時世尊爲烏那曳曩說伽
陀曰

佛眼淨能見 無所著之者 見無邊不往

汝何能將往 佛眼見無邊 不著貪愛者

精進力無往 汝何能將往

若人心不亂 彼亦無降伏 無邊智無步

汝何能堅往

若人有得無降伏 彼亦無有不降伏

如佛進力步無邊 汝以何步能堅往

時烏那曳曩曰世尊言我欲持此所說得頌聞淨飯
王佛告烏那曳曩我意不爾又曰若不爾者其意云
何佛言欲汝出家又曰我本來時與王有約若是見
佛定須廻還佛言汝勿違約要去可去但剃髮染衣
斯亦無礙烏那曳曩言世尊爲菩薩時尚依父母師
長之所教授我今何敢不依教也今求出家願佛濟
度佛卽應時度爲沙門佛便告言烏那曳曩汝今可
往若到本國至宮城門不得便入但立門外請報於
王或問何名稱釋迦苾芻王或呼召乃可前進又若

問言汝實是釋迦苾芻否卽荅是實若問一切義成亦如是像耶荅言亦爾又問一切義成來否言來當在何時便言後當七日言訖便出若留者亦不得任王曰一切義成若來任宮內否荅言不住王曰樂住何處荅曰林野或任精舍若問何名精舍便可如祇樹給孤精舍具以聞奏佛教示已烏那曳曩欲行佛又告言王者一言便成富貴天起心念一切皆得一切聖人亦復如是佛借神力烏那曳曩於刹那頃到迦毗羅城如佛所教心住正念到宮城門住立不進謂闍吏曰汝可奏聞有釋迦苾芻詣門不進王令呼

入時烏那曳曩蒙召卽入淨飯纔見恠而問曰烏那曳曩汝出家耶荅言出家王言汝當去時何言奏我荅曰奉命卽爾本不出家世尊威神方便開化佛世難值正法難聞皇子尚捨至尊小臣何可固執王言似責心實不瞋又以儀相非常不以舊臣見待卽命上殿執手慰勞乃令近臣敷座盥淨奉上湯藥及果食等烏那曳曩威儀非凡舉止有則言必詳審情極和暢王以初覩烏那曳曩剃髮易服言論久之全忘問佛及至於此而復問言我子一切義成善相威儀亦如此耶荅言以我喻佛由將芥子等須彌山又如

牛跡比於大海乃至窓牖之明同彼日光王聞是語
思念於子不覺悶絕朴於地上近臣以水灑面方蘇
良久復問我子來耶荅來又曰何時到來後當七日
王卽下勅潔淨內宮嚴飾殿宇以備世尊及聖衆至
烏那曳曩白大王言世尊若來不住宮內王曰樂在
何處若非林野卽住精舍王曰何名精舍烏那曳曩
卽以精舍次第白於王曰十六殿堂六十小堂世尊
居中聖衆四布諸受用具悉使備足王聞說已遣使
速往你也訖誡嚙馱林克日併功如給孤精舍次第
建立倍持珍寶而嚴飾之

爾時世尊至時遣大目犍連汝可徧告諸苾芻衆我
今欲往迦毗羅城宜各受持袈裟應器或可爲見父
母宗親而行化利大目犍連奉佛教勅具以佛言徧
告一切阿羅漢等已佛領大衆出給孤精舍往赴迦
毗羅城父王之請諸阿羅漢前後圍繞佛卽瞻顧謂
阿羅漢等曰我此眷屬是調伏是離欲是善解脫是
阿羅漢是佛眷屬譬如牛王處於衆群亦如象王衆
象圍繞師子王師子圍繞鷲王衆鷲圍繞金翅王金
翅圍繞又如衆學隨師衆病求醫衆兵輔將衆商依
主又如轉輪聖王千子圍繞持國天王樂神圍繞增

長天王鳩盤茶鬼圍繞廣目天王龍衆圍繞多聞天王夜叉圍繞日天千光圍繞月天衆星圍繞帝釋天衆圍繞梵王梵衆圍繞乃至復如悉帝彌魚處於海中亦如海神攝聚衆水如來之身三十二相八十種好具足圓滿光明莊嚴如千日光照耀一切行步巍巍猶如寶山具足大悲十力四無所畏等一切諸法爾時世尊與是眷屬隨路而去次第遊化至迦毗羅城不遠有嚕賀迦河時淨飯王將諸眷屬及大小臣同在河邊預嚴寶蓋幢幡擊鼓吹貝廣設妓樂焚香散花願望世尊又復自嚕賀迦河至你也合二誡嚕馱

林乃至城中及與鄣外王勅士庶預令嚴潔丘墟沙礫悉使除去布以淨土灑以香水量其遠近各置香爐俟佛經過焚香供養時迦毗羅城士庶長者若男若女各各執持殊妙香花立於路次供養世尊是彼人衆咸謂世尊昔爲太子今得成佛歡喜踊躍欲觀儀範又有起念父子相見其禮云何若子拜父與世無殊若父拜子國禮未可太子修道苦行成佛必應與世有別異也人衆填噎路無間隙佛與聖衆將至河次諸王眷屬悉在彼處乃自思惟今迦毗羅城父王眷屬及人民等各各念言太子去時百千天人前

後圍繞乘空而去雪山修行又云已成正覺領衆化
導今徒步歸國有何奇特我今宜應現其神足令父
王見及使人民歎異歡喜王及眷屬自見大衆方欲
奔趨迎接世尊佛於是時入三摩地出於東方虛空
之中現行立坐卧四威儀相或身上出水身下出火
身上出火身下出水復於身中放大光明或青或黃
或赤或白及與紅等間雜諸色猶如玻瓈互相映徹
乃至南西北方亦復如是又諸苾芻各各現通踊身
上昇高七多羅樹世尊於中亦現一身諸苾芻眾現
通不等或六多羅樹或五或四或三一一佛恒高出

與衆有異如是現已佛與聖衆忽然隱沒如彈指頃
已在本處王及眷屬倍生信仰既前迎接王見大衆
皆被袈裟儀相相似初不辯認誰是世尊孰爲弟子
時烏那曳曩引淨飯王至世尊前王見世尊尚存子
想烏那曳曩乃謂王曰如來斷煩惱習心得自在如
日照世住於虛空乘真如乘證最上覺圓滿十力具
一切智相好光明清淨照物於法自在利益無邊請
王歸仰當求聖道時淨飯王聞此語已惺悟諦信五
體投地禮佛雙足說伽陀曰

生時大地皆震動

樹影覆身不隨日

復以普眼觀衆生

是故我禮最尊足

時諸釋衆見淨飯王禮佛足已卽有言曰世尊云何
皆於世法化衆生也王聞衆議告而言曰汝豈不聞
悉達生時大地咸皆六種震動一切世間光明普照
所有黑闇日不到處諸威德光亦所不及是時光明
皆悉照耀被黑闇處所有衆生皆以惡業而墮於中
忽因光照互得相見各有各有言此中何時更生衆生
於此之時我已頂禮最尊之足是悉達多未出家時
行詣瞻部樹下而坐清淨無欲離不善法已斷一切
分別疑惑樂任無諍寂靜之定一切林樹影隨日轉

瞻部樹影陰身不移我旣得見驚怖非常乃於此時
又禮尊足我今所禮方在第三

佛說衆許摩訶帝經卷第十二

音釋

商

下口角反謂商度推畧也

迫及

上音待

芳葩

下足麻反花也

美

蹂踐

柔賤二音

心凝

下魚陵反嚴

也

完具

上惠

網縵

下莫反

履

門闔

下苦本大

曳尾

上羊反

支

阿唵

下仁

蔓延

上音萬下羊羨反正

音

闢吏

上音昏下力置反

盟

古玩

學

斂

下蒲反

鄣外

上音斤噎反

經

佛說衆許摩訶帝經卷第十二

七

命七

杭州臨安縣大山村信士林江 徐尚禮 林
 應鳳 林應鸞 林應魁 又 信女徐氏
 周氏 徐氏 却氏 厲氏 氏 蕭氏 林氏
 助刻
 衆許摩訶帝經第十二卷 計字六千二百零
 九個 該銀三兩一錢零五厘 伏願
 六根雪淨 三障冰清 生生啟悟 妙心世世弘開
 道眼者
 求寂子常乎對
 崇禎九年孟春月徑山化城寺識

佛說衆許摩訶帝經卷第十三

宋奘譯經三藏朝散大夫試鴻臚少卿明教師臣法賢奉 詔譯

爾時淨飯王說是語已心有所思忽然淚下復說伽

陀問世尊曰

往昔住宮中 多人同衛護 山野中怖畏

一身云何住

世尊荅曰

聖者十種住 我悉已安處 牢繫今解脫

非住人王宮

王曰

象牀金寶飾 昔為汝所寢 山野唯草木
云何得安眠

荅曰

解脫之卧具 菩提分莊嚴 眠睡甚適悅
無一切熱惱

王曰

象馬及輦輿 昔出入所乘 一切棘刺地
今云何可行

荅曰

我有神足車 精勤乘往復 雖行一切地

王曰

不礙煩惱刺 迦釋迦妙衣 嚴身昔自在 今袈裟麗衣
云何忍被服

荅曰

僧伽梨麗衣 牟尼山中服 著已善相生
見者皆深悅

王曰

金寶器中食 恒食最上味 今自持應器
所食知云何

卷
三
命
八
答曰

等引法味寂
食之得出離
已斷世間受
愍世故行化

王曰

乳糖水甘美
飲之昔無厭
今所飲冷熱
清濁知云何

答曰

王貴盛之水
世間人爭飲
飲已或增染
如我無愛樂

王曰

寶殿及樓閣
昔者隨心住
今獨處山林
云何得無怖

答曰

已斷煩惱本
諸怖畏不生
極微我亦無
隨處得安住

王曰

清淨妙香水
昔時恒沐浴
今獨山野中
誰浴牟尼王

答曰

戒香漬法水
有德人恒浴
潔身到彼岸

無量聖所說

王曰

昔妙香塗身 及著迦釋衣 恒處內宮殿
離彼非相稱

荅曰

戒香最芬馥 用塗身莊嚴 我今非愚迷
離寶衣嚴飾

王曰

何處得輕慢 何處可怖畏 無事及有事
今問願當說

荅曰

老病死三法 可怖勿輕慢 當求適悅境
無事應愛樂

爾時淨飯王聞是說已歡喜無量讚言善生釋族於
世八法而皆不染復以頭面禮如來足又復思惟我
得善利我子乃證如是功德王與眷屬奉送世尊入
你也合二譏嚙默林精舍

爾時世尊既至精舍登法座已王及大臣乃至士庶
圍繞瞻仰虛空諸天歡喜讚歎佛觀會眾各各心意
及與根性如實知已廣爲解說四聖諦法時白淨飯

釋經
卷之三
王及釋衆等七十七千人皆證須陀洹果世尊又觀
何處緣熟彼梵現林時可說法佛與大衆悉詣彼處
無量人衆相隨聽法世尊廣說四諦行相彼斛飯王
迫於釋衆乃至人天有七十六千人又證須陀洹果
世尊復詣嚕嚩怛迦林亦有無量天人釋衆眷屬人
民士庶隨佛聽法世尊同前廣演四諦甘露飯王及
釋衆等乃至人天有七十五千人證須陀洹果餘有
證斯陀含果者有證阿那含果者有證阿羅漢果者
有發聲聞菩提心者有發辟支菩提心者有發無上
菩提心者亦有出家斷諸煩惱後證阿羅漢果者乃

至有發三歸心者時提婆達多既見世尊現於神變
及說妙法自無所證乃生妬心發不善言謂釋衆曰
一切盲人樂斯幻化此幻化事一切能作有一釋衆
名鉢羅摩拏野告提婆達多言汝勿於世尊大丈夫
所發如是惡言提婆達多尋便默然時淨飯王起心
思惟昔者天人阿修羅爲世間供養今佛出世真是
世間恭敬供養有釋童子說偈讚佛曰

釋種大僊大丈夫

能降妙法甘露雨

救濟墮落黑闇者

開解脫門爲引導

爾時淨飯王聞此童子說偈讚佛深心歡喜然於真

實而未見諦唯云世尊是大丈夫具大威德誰有聖子而同我耶世尊思惟父淨飯王不見真實乃爲二事一者我心二者分別心若能離此可見真實佛觀大目犍連於淨飯王而有宿因佛謂大目犍連曰汝以方便化淨飯王令離我執於是大目犍連卽詣王處王見尊者心便歡喜尊者應時入三摩地隱於王前乃出東方虛空之中現行立坐卧四威儀相又復身中放五色光猶如玻瓈互相映徹或身上出水身下出火或身上出火身下出水如是種種現於神變東方若此南西北方亦復如是作神變已沒於虛空

如彈指頃已在王前王曰佛弟子中更有如尊者否時大目犍連卽說偈曰

世尊弟子大威德

三明六通皆自在

解脫三界阿羅漢

聲聞牟尼如我多

時淨飯王初謂世尊獨有是事心中常存我執之相及大目犍連現神變已乃知弟子亦有斯證王之我心由此得滅於是世尊卽以方便作世間心云何得梵王帝釋及淨光天來我爲說法於意云何如來之心非聲聞菩薩之所能知所以然者世間之心下至蟻子尚令得知何況諸天於是帝釋告毗首羯磨天

經
身言及帝釋十三
六
論八
子言汝化你也仁誡嚕馱林作大法會其中臺殿樓閣悉安師子之座咸以衆寶而爲嚴飾復開四門各以四寶莊鉸復令四大王而守護之時毗首羯磨天子承帝釋命變大法會種種嚴飾如帝釋教仍令四王爲守門者作變化已白於世尊法會已成請佛往彼是時世尊與自眷屬及梵天帝釋淨光天等無數百千之衆還你也仁誡嚕馱林佛既到已入於寶殿昇師子座卽說妙法時尊者大目犍連與淨飯王同詣佛所至法會門尊者直入王卽止住王曰何故障我對曰佛爲淨光天等說法凡人不得預會王曰

汝何賢聖居此守門對曰我是持國天王時王乃問東門卽爾南門可否對曰不知既至南門復不得入王乃問言何故如是對曰佛爲淨光諸天說法凡人不得預會又問汝何賢聖居此守門對曰我卽增長天王故守南門王自惟曰我去西門應恐得入既至於彼亦不得入王又審問何故如是對復如前又問汝何賢聖答曰我是廣目天王淨飯王長息歎曰聖凡相隔雖近至遠既心切見佛更往北門至彼同前止不令入王卽厲聲謂守門者曰賢聖勿是北方天王否對曰我卽毗沙門也時淨飯王聞此語已迨將

悶絕又復思惟我雖至親今則踈遠我親分別從此泯滅於是世尊知無分別又察情極若不時見恐致無常佛以神力變樓臺殿閣乃至垣牆悉成玻瓈清淨映徹內外相覩無所障礙王得見佛心極歡喜卽便禮拜於一面坐

爾時世尊種種方便化其父王令無我心及除分別卽爲廣說苦集滅道四聖諦法王得聞已所有身見如二十山峰以金剛智破滅無餘便證須陀洹果王思念曰我今所證非天非仙非父非母亦非親愛一切眷屬之所獲得當從如來慈孝所致又復思惟我

於過去輪迴生死骨聚如山血淚成海或復墮落諸惡趣中今日乃入解脫門預於聖道又復言云善哉世尊往昔修行無數苦行不顧身命爲利衆生我今更求殊勝天報佛卽作念王今云何求斯報也時淨飯王卽從座起合掌頂禮白世尊言今欲請佛及諸聖衆於我宮中來晨受食唯願大慈咸垂降赴佛卽默然王知許已禮謝而歸纔至宮中詔白淨飯王告而言曰我已證道不樂王位汝受灌頂代我理國白淨飯王問何時證耶荅曰適於你也合誡嚙馱林聞法得證白淨飯王曰世尊初到彼林我已得證王云

代位我實不能又詔斛飯王曰汝可灌頂代我理國
對曰我於梵現林中聞法證果所言代位誠不樂也
又謂甘露飯王曰汝受灌頂代我理國對曰我於嚕
嚩多迦林聞法證果今亦不樂處王位也淨飯王曰
若如是者當令何人守宗社也諸王咸言釋族之中
有賢德者可令守之議事已畢

淨飯王曰速令所司辦造種種珍饌飲食令極香美
又勅潔淨內外除去葷穢於正殿上當以清淨茵褥
及上妙衣敷置如來及聖衆坐位復設香花及淨水
瓶無使闕備既至來晨遣使白佛今食已辦請佛及

衆同賜降臨

爾時世尊與諸聖衆前後圍繞行詣王宮受食供養
佛至宮門王與眷屬執爐焚香引世尊入佛昇座已
諸聖衆等次第就坐時淨飯王與諸眷屬禮拜問訊
讚歎訖卽親手奉上種種飲食而伸供養食畢澡漱
供心圓滿時淨飯王卽取金瓶灌世尊手白言奉施
你也二誠嚕默林精舍願佛隨意瓶水出時有五功
德聲佛亦施願云以所施福王及釋族一切所求隨
意獲得王及眷屬聞是語已歡喜踊躍禮佛而退佛
及聖衆廻還精舍後於一日世尊復在王宮受食王

之眷屬互相謂曰今世尊左右皆是耆年善相威儀誠堪仰重然侍奉世尊未爲允當可於釋族選其年少有賢善者便令出家侍佛左右貴得相稱時淨飯王勅下親族內外臣佐今一切義成捨轉輪王位苦行修習爲大法王宜各選其賢子捨令出家侍從世尊以成其美時斛飯王有二子一名阿你嚕駄二名摩賀曩摩彼摩賀曩摩能理王務然貪財利阿你嚕駄常處宮中隨意受樂時斛飯王以勅旨宣下乃呼摩賀曩摩汝可出家以奉王命子曰我不出家彼阿你嚕駄常在宮中受其快樂可令出家父言彼子福

德汝勿指陳子曰此是父母愛憐所許若實有福當可試驗父曰當何試驗子曰常式送食今可空盤送之若其有福食自然出父卽對面封以空盤令宮嬪送之誠曰若問何食但對種種在內時天帝釋觀知此事阿你嚕駄昔曾以食供辟支佛今日云何令其無食乃化種種珍美品饌滿彼空盤女使至彼阿你嚕駄問言何物宮嬪心嗔不依誠勅荅言無物阿你嚕駄卽思念曰父母云何送空盤耶乃開封視之異饌滿中人所罕見馨香馥馥園苑皆滿阿你嚕駄意亦深恠問彼女言本有食耶本空盤耶女曰空盤遂

却以此食奉上父母父母見食亦不驚恠又以此食示摩賀曩摩汝看此食是彼化出彼阿嚕駄人皆愛樂我言大福非汝等力汝初不信今已驗知摩賀曩摩白父母言彼既大福可令出家我今無福非出家者父母卽謂阿你嚕駄曰王今有勅汝出家否對曰出家有何利益在家有何過失父母言出家之人當證涅槃可受天上人間第一供養若人在家出家真實離欲亦得天上人間供養若是在家妄稱出家當感三惡道報對曰出家在家得利失利我已曉了今欲出家上副王命父母告曰汝言大善時阿你嚕駄

有一同年名曰賢王最相知見乃往彼處而相告白至賢王門方聞品琴又值絃斷五音不足阿你嚕駄擅琴之聲止立不進待其調品令人入報賢王請入謂阿你嚕駄曰汝來何時荅曰琴絃初斷我已到門待其調品方令人報賢王稱善執手請坐汝今何來對曰淨飯王有勅令釋族出家意欲眷屬侍佛左右以汝慕善故來相報賢王曰勅旨纔下尋亦便知汝旣出家我亦同往汝可今夜宿於我舍阿你嚕駄隨言卽止賢王令人爲敷卧處至夜眠睡無少安樂明晨相見賢王問言得安睡否報言不得安睡又問何

故如是对曰牀所鋪者病觸之衣是以令我不獲安寢賢王卽喚所司侍人問其緣由自何而得對曰王初生時敷設餘長後因疾患曾已受用賢王歎曰善哉釋族生此異子又言我出家者提婆達多次當王位乃令左右呼提婆達多到已問言我等奉勅咸去出家未委汝今當何所作時提婆達多私自念曰若或我言不出家者卽令賢王亦不出家便以誑言我亦出家時彼賢王速以公文奏淨飯王王乃下勅告示内外令賢王阿你嚕駄及提婆達多等釋種五百人出家咸可知悉勅出之後中外歡喜唯提婆達多

獨自苦惱意云本作方便欲令賢王出家今或違言有妄語過使我將來不得王位於是剛忍隨衆出家時淨飯王欲令後代知族尊貴宣告内外凡是街衢迨及城隍一切嚴飾皆使殊勝布以淨土灑以香水復排幢幡傘蓋散花燒香以擬賢王等五百釋種出家經過彼釋種等各各父母於衢路側及城門首敷設觀看亦命相師各相其子誰可出家誰當不可賢王先出相師稱歎此若出家必證聖道阿你嚕駄次行出城相師亦云得聖非久提婆達多出至城門頭上寶冠忽然墮地相師見已此惡業人定入地獄又

不善人名曰海壽纔到門際驢作惡聲相者知之此有口業曾謗聲聞當來果熟定墮惡趣烏波難陀次出乘象方至門首瓔珞墮地乃自下象親手收取相師言曰此鄙吝人當入地獄如是五百釋種各各出已相師皆見咸以善惡具告父母時釋衆等出迦毗羅城復遊園死次至佛處各各白佛云求出家世尊思惟今此釋衆雖求出家有志樂者有不樂者佛以四法度爲苾芻時淨飯王有承事人名烏波梨善能剃髮王卽遣與釋衆剃髮既至彼處不肯與剃乃作色煩惱又復悲泣賢王問言何以如是烏波梨曰我

奉一人非衆所使可寧捨命髮不能剃賢王諫曰勿作是言汝奉王命非衆可使此有善利請無煩惱賢王復以方便告釋衆曰汝等出家寶冠妙衣及莊嚴具今日已去咸無所用都置一處與烏波梨彼聞得者或可歡喜衣冠旣集乃成大聚時烏波梨卽與剃髮及觀釋衆各各年少捨其富貴我今卑族何所戀耶宜可棄彼恩愛去離煩惱免其輪迴生滅之患於是耨頤再三付度尊者舍利弗見而問曰汝何耨頤似有不樂荅言非是不樂有所思念具以情實告舍利弗舍利弗謂曰世尊度脫非問尊卑今正是時宜

其猛利世尊預知專期根熟舍利弗將烏波梨來至
佛前五體投地伸其禮敬白言世尊今烏波梨欲於
正法出家願佛哀愍佛告烏波梨言汝得梵行世尊
言訖鬚髮自落袈裟著身後七日中鬚髮再出威儀
庠序如百臘苾芻自說伽陀曰

我今於如來 正法求出家 佛言得梵行

鬚髮尋自落 袈裟亦著身 此卽從善本

今日方成熟 故我爲苾芻

爾時世尊告大衆言今出家者可依夏臘次第守其
尊卑乃至未來禮不得闕於是烏波梨平視諸釋時

彼賢王次第禮衆至烏波梨前不肯禮拜來白世尊
今烏波梨是承事人今我禮者是不順也佛言汝旣
出家當除我相彼是上臘宜伸禮敬賢王纔禮地六
震動次提婆達多亦不肯禮又來白佛佛言出家之
人當除我相彼是上臘宜可禮足於是諸釋無不禮
者諸苾芻等各各心疑今賢王禮拜地六種動有何
因緣唯願世尊解諸疑網佛言過去世時此閻浮提
波羅奈國有王統御名曰梵壽國界豐盛人民快樂
時彼城中有一倡女名跋捺囉色相端嚴人所愛羨
有一男子名孫那囉摩拏嚩迎往彼女處言意相慕

女卽報云備五百金錢可來相見是人貧賈莫副所言別以方便而親附之遂移居相隣時奉花果後因節序男女作樂嚴身戴花各銜其美時跋捺囉起思念曰孫那囉摩拏嚩迦彼人若來共作喜樂湏臾來至女卽喜曰可取花來與汝作樂孫那囉摩拏嚩迦此日有小心極煩惱通宵無睡及天將曉熟寐不覺衆人取花好者已盡乃得尸利沙花將與彼女彼女不悅卽說偈言

戒不精進業 怠惰重睡眠 衆採好花去
得尸利沙花

又復告言汝求別花時初秋月暑氣猶鬱乃再去尋花以至中午採花唱歌都不覺熱值梵壽王入草詣林避熱忽聞歌唱令人尋求見已呼來乃謂之曰日光下照如火燒腦云何歌唱都無所苦卽以伽陀對曰

我心迷故 非日不照 爲事有少 故不知苦
時王思惟此採花人能言乃留與語王曰我出值熱來此求涼汝可以言解我熱惱孫那囉摩拏嚩迦本有智慧所言稱旨乃說征伐之利投王心機王聞歎奇卽忘熱惱宣問大臣有於剎帝利灌頂王所假身

命難者最上之賜國有何典大臣對曰可與儲君卽
勅大臣冊居其位告報內外准式備儀禮赴春宮尊
處儲貳凡曰受用無非珍寶寢卧之所茵褥異常孫
那囉摩拏嚩迦私自惟曰儲君若此尊極可知便起
貪心欲謀大寶纔發斯念便自覺知我或如斯堪云
來報由是追悔寢不安處乃施麤席卧於地上至明
旦已王卽遣使觀其動止乃見孫那囉摩拏嚩迦卧
於地上速來白王此非儲君乃賤人爾王曰何知具
事上聞王曰此大智人非是賤士乃令詔來詢問其
故王曰夜不寢牀卧於地者何意對曰貴非究竟所

以不樂王曰汝意如何今欲出家王復言曰未知此
事云何出家有何功德荅言於寂靜處苦節修行亦
無聖師亦不求侶觀緣寃理證獨覺菩提王卽稱善
放令出家後證道果來至王前於虛空中現神變相
王親是事深生歸信五體投地以伸敬禮卽說伽陀
曰

善哉智慧人 非惡業能繫 求寂靜修行

證獨覺菩提

說伽陀已又復言云若有諸摩拏嚩迦出家求道我
卽隨喜時有近臣名菟誡波羅聞此偈已忻樂非常

記憶在心誠其貪愛王因此後亦自勗勵乃踈宮室
多樂寂靜說波羅後接王喜遂求出家王既允許
拜辭而出卽詣深山逢苦行仙人便隨學道精勤策
勵亦證五通徑來王前現其神變王乃問曰汝得如
是功德耶荅曰我證王謂證聖便禮其足頭纔至地
地卽震動是時王母察此非真乃爲殄誡波羅說伽
陀曰

若根本出家 禮事於沙門 寂默及精進
苦行成緣覺 一切罪永滅 一切福業生
後於諸世間 廣利樂衆生

佛告諸苾芻昔梵壽王者今賢王是殄誡波羅者烏
波梨是往昔禮拜地已震動今日致禮與本無殊諸
苾芻此過去現在種種之事今爲汝等再分別說汝
等聞者宜其諦信時諸苾芻聞此說已歡喜踊躍禮
佛而退

佛說衆許摩訶帝經卷第十三

音釋

漬

疾智切

醞

醞敷文切醞房六切醞香氣也

鉸

古效切 擅

切專

銜

銜白矜也

儲

陳如切 殄

勗

勗吁玉切

勗勵勉力也



休寧縣居士李修明修玄 助刻

衆許摩訶帝經第十三卷 計字五千六百五十

五個 該銀二兩八錢二分八厘 伏願

六根雪淨三障冰清生生啟悟妙心世世弘開道

眼 海虞釋常孚對 崇禎九年季夏月徑山化城寺識

Vertical text in the left margin, including the name '李修明' and other characters, likely a colophon or donor information.